

張氏醫通

張氏醫通卷十一

長洲石頑張

璐路士父

纂述

男

以柔安世

訥遜言

參註

婦人門下

產後

經曰。乳子而病熱。脈懸小。手足溫則生。寒則死。

乳子中風熱。喘鳴肩息者。脈實大而緩則生。急則死。

上條言產後以乳哺子之時而患熱病。其脈只宜

懸小不宜實大者以產後新虛故也。設脈雖懸小而見手足逆冷。又爲脾氣衰絕。陰氣暴逆之候。亦主死也。下條言產後中風熱而至喘鳴肩息。以風熱逆於陽位。其脈必不能懸小。但須實大之中而往來和緩。則脾胃之氣在其中矣。設見急疾胃氣已絕。安得不死。後世以爲乳子二字誤認。小兒如張介賓之明。亦不加察。且因此而謂小兒不當視虎口三關。卽宜診兩手六部。非智者之一失歟。

金匱云。問曰。新產婦人有三病。一者病瘧。二者病鬱。

胃三者大便難何謂也。師曰：新產血虛多汗出，善中風。故令病瘕。亡血復汗，寒多。故令鬱冒。亡津液，胃燥。故大便難。產婦鬱冒，其脈微弱，嘔不能食，大便反堅。但頭汗出，所以然者，血虛而厥。厥而必冒。冒家欲解，必大汗出。以血虛下厥，孤陽上出，故頭汗出。所以產婦善汗出者，亡陰血，虛陽氣獨盛，故當汗出。陰陽乃復，大便堅，嘔不能食，小柴胡湯主之。

病解能食七八日更發熱者，此爲胃實。大承氣湯主之。

產後氣血俱虛。汗下皆禁。獨此一證用大承氣者。乃證治之變。不當以尋常例測也。以其病解之後。尚有餘熱在胃。所以能食。食入既多。至七八日。更加發熱者。此必復傷飲食之故。故知胃有實結。恐其煎迫津液。故以急下救陰爲務。然必年體強旺。脈證俱實。且時日既久。與新產大便難不同。是可議下。設遇胃虛之人。雖能食而所食不多。卽有發熱便秘。亦屬血虛。急宜調養氣血。斷非承氣所宜。不可恣行攻擊也。

產後腹中疝痛當歸生薑羊肉湯主之并治腹中寒
疝虛勞不足若寒多者加生薑成一觔痛多而嘔者
加橘皮一兩白朮一兩

產後腹中疝痛乃寒積厥陰衝脈故用辛溫以散
血中之寒助以血肉之性大補精血較諸補劑功
効懸殊若腹痛兼嘔而所嘔皆是稀痰是知脾虛
濁氣上逆故加橘皮以宣散其氣白朮以固護其
脾倘見血逆而嘔所嘔渾是清水腹脹滿急則加
桃仁肉桂具見言外矣至於寒疝虛勞少腹結痛

總是下焦寒結亦不越方也。

產後腹痛煩滿不得卧。枳實芍藥散主之。并主癰膿以麥粥下之。

仲景凡治腹痛多用芍藥。以其能收陰氣之散也。以其能除血痺之痛也。以其能緩中而止急痛也。本草謂主邪氣腹痛。故多用之。蓋五氣之邪莫如厥陰肝木之性急暴。一有不平則曲直作痛也。此方治疔痛用芍藥爲主佐以枳實炒黑入血破積聚收陰緩中逐陳致新麥粥補血下氣而壯血脈。

也

師曰產婦腹痛法當以枳實芍藥散假令不愈者此爲腹中有乾血著臍下宜下瘀血湯主之亦主經水不利頓服之新血下如豚肝

血之燥乾凝著者非芍藥枳實可能治須用大黃桃仁蟅蟲下其血閉更加蜜以緩大黃之急也

產後七八日無太陽證少腹堅痛此惡露未盡不大便煩躁發熱切脈微實再倍發熱日脯時煩躁者不食食則譫語至夜即愈宜大承氣湯主之熱在於裏

結在膀胱也

太陽爲表膀胱爲裏七八日表證入裏故曰無太陽證惡露已爲病氣所鬱不能盡去。因入裏與惡露相搏結在膀胱而作少腹堅痛下焦熱極故不大便煩躁發熱更切其脈微實再倍其發熱在日晡時而煩躁不食熱邪又攻於胃胃熱則不食食入則穀氣之熱更助兩熱相併故讖語至夜卽愈者產後血虛熱邪易入血室入血室則夜如見鬼狀言此以明其熱不在血室而在膀胱與胃故

用大承氣湯也

產後風續之數十日不解。頭微痛惡寒。時時有熱。心下悶乾嘔。汗出雖久。陽旦證續在者。可與陽旦湯。舉此與上文承氣湯爲表裏之例。

產後中風發熱面正赤。喘而頭痛。竹葉湯主之。溫覆使汗出。頸項強用大附子一枚。破之如豆。入前藥。揚去沫。嘔者加半夏半升洗。

此證太陽上行至頭表。陽明脈過膈上循於面。二經合病。多加葛根。以葛根爲陽明解肌藥也。防風

佐桂枝去二經之風。竹葉桔梗主氣上喘。參草和中氣。薑棗行營衛。穀氣行則上下交濟。而汗出解矣。附子恐是方後所加。治頸項強者。以邪在太陽。禁固其筋脈。不得屈伸。故用附子溫經散寒。揚去沫者。不使辛熱上浮之氣。助其虛陽上逆也。若邪在胸而嘔。加半夏治之。上言破之。如豆入煎藥。舊本作如豆大。今如徐忠可駁正。

婦人乳中虛。煩亂嘔逆。安中益氣。竹皮大圓主之。有熱者。倍白薇。煩喘者。加柏實一分。

乳中虛言乳哺而乳汁去多則陰血乏而胃中亦虛。陰乏則火撓而神昏亂。胃虛則嘔逆。用甘草瀉心火。石膏療煩亂。竹皮主嘔逆。桂枝和營氣。又宣導諸藥。使無枵格之逆。煩喘者爲心虛火動。故加栝實以安之。

產後下利虛極。白頭翁加甘草阿膠湯主之。

傷寒厥陰證熱利下重者。用白頭翁湯。苦寒治熱。以堅腸胃。此產後氣血兩虛。故加阿膠甘草。然下利血滯也。古人云。血行則利自止。此方豈獨治產

後哉。

婦人在草蓐。自發露得風。四肢苦煩熱。頭痛者。與小柴胡湯。頭不痛但煩者。千金三物黃芩湯。

自發露。謂自發衣露體得風。非邪外傷者。故不爲自汗風病。蓋產時天機開發。雖微風亦得入之外感之風。內應之火。合化淫於四末。而作四肢苦煩熱。上至於頭。作頭痛。病在表裏之間。故用小柴胡湯。主治少陽。若頭不痛。是無表也。惟肝膽風熱內動。上膈作煩。故用黃芩退熱。苦參養肝。熟地補血。

而益腎水則肝膽之火寧矣

婦人產後虛羸不足腹中刺痛不止吸吸少氣或苦
少腹中急摩引腰背不能食飲千金內補當歸建
中湯產後一月日得服四五劑爲善令人強壯若太
虛加飴糖六兩湯成內之於火上煖令飴消若去血
過多崩傷內衄不止加地黃六兩阿膠二兩合八味
湯成內阿膠

產後血去營衛俱虛內不充於五藏肝木妄動作
腹中刺痛上不充於膈中遂吸吸少氣下不濟於

腎故少腹急引外連腰脊六府不和則不能食用
此以益營衛伐肝邪補中和內○按此卽黃耆建
中之變法彼用黃耆以助外衛之陽此用當歸以
調內營之血然助外則用桂枝調中則宜肉桂兩
不移易之定法也

千金二字義見中風門方千金三黃湯下

諸禁○一禁卧二禁酒三禁浴四禁寒五禁汗六禁
下七禁利小便八禁寒涼藥九禁起動作勞蓋初產
血氣未定遽卧則惡血上升故分娩之後須高卧仰
倚切不可卽卧三朝始可稍去其墊尚宜高枕七日

後如無他病方可安枕。多有半月後未能貼蓆者。酒能助火亂經。誤用不無動血之虞。至如雞子猪腎一切滯氣堅紉難化物。及生冷膩滑皆不可食。卽砂仁湯亦能動血。咸在禁例。浴能升動惡露。雖當夏月亦須禁之。曾有產數日後因浴瘀血上衝而斃者。亦有因浴動血誤用寒涼。瘀結不行。血化爲水。喘滿腫脹而死者。不可不慎也。新產驟虛最忌著寒。寒則血氣凝滯。諸變冗生。每至飲食不化。腹痛作瀉。禍患莫測。欲去其瘀則正氣并脫。欲止其瀉則瘀結不行。惟薑

桂參朮辛溫峻補庶幾血行。瀉止故冬月一產卽宜
重綿兜護其腹。在夏月亦當複巾裹之。機要云胎產
之病從厥陰。無犯胃氣。及上中二焦爲之三禁。不可
汗。不可下。不可利。小便制劑之法。能不犯三禁。則營
衛自和而寒熱止矣。故產後雖有表證。一切風藥皆
不可用。以其性升。不特載血上行。令人發暈。抑且令
人亡陽。多致汗脫而死。不特風藥當禁。卽佛手散中
芍藥皆爲散用。恐湯能發汗也。至於下藥尤爲切禁。
非特硝黃難於輕試。卽溲便數難者。只宜調養元氣。

若車前澤瀉之類。咸非所宜。以產後百脈空疎。自裏至表。無一不虛。虛則諸寒皆禁。卽芍藥亦難輕用。以其酸寒伐生發之氣也。地黃皆當慎用。以純陰之味。能令作瀉也。黃芩能凝滯瘀血。令人惡露不行。爲害不淺。然皆產後常禁。設有表裏客邪。又不當拘於上說也。試觀金匱產後例中。陽旦湯之用芩芍。以其中有桂也。薛按八珍十全之用熟地芍藥。以其中有參朮及桂也。豈復拘於此例哉。況乎大承氣小柴胡三物黃芩下瘀血等方。皆產後治例。此聖人臨證如日。

大轉回天之手。非尋常下士可得而測識也。迨夫早起作勞。不避風寒。不禁飲食。往往致成大病者。皆自作之孽耳。○凡產後之脈寸口洪疾不調者死。沉微附骨不絕者生。緩滑沉小者吉。實大弦急者危。牢革結代及滯滯不調者不治。

血暈○產後元氣虧損。惡露乘虛上攻。眼花頭暈。或心下滿悶。神昏口噤。或痰涎壅盛者。急用熱童便主之。若血下多而暈。或神昏煩亂者。芎歸湯加人參三五錢。澤蘭葉一握。童便半盞。兼補而散之。痰合二陳。

加烏梅薑汁并用鐵秤鎚燒令赤以醋沃之或燒漆
器并亂髮以烟熏之產後因虛火載血上行而暈用
鹿茸灰爲細末好酒童便灌下一呷卽醒行血極快
產後昏暈嘔逆不能飲食此胃虛挾痰所致以紙聖
散去赤芍加炮薑茯苓慎不可用芎歸血藥臍膈其
嘔逆愈不能止矣○初產血暈速與扶起勿卧用韭
葉一握切碎入有嘴磁瓶中將醋煎滾澆入瓶內密
蓋瓶口以嘴向婦鼻孔令氣透入鼻中卽蘇若惡露
未盡忽昏悶不省人事須問先因感氣而墮胎者以

二陳加芎歸香附桃仁山查薑汁切不可作中風治
產後口眼喎斜等證當大補氣血十全大補下黑龍
丹肥人佐以痰藥如星半木香之類若作中風治而
用小續命必殆若腹中刺痛者嚴氏清魂散血暈語
言顛倒健忘失志此血入心包宜失笑散加鬱金或
用血竭沒藥等分爲末熱酒和童便調下二錢良久
再服惡血自下

三衝○敗血上衝有三或歌舞談笑或怒罵坐卧甚
者踰牆上屋口咬拳打山腔野調號佛名神此敗血

衝心多死。方書用龍齒清魂散。然用之多不應。不若
花葉石散最捷。琥珀黑龍丹亦効。如雖悶亂不致顛
狂者。失笑散加鬱金。若飽悶嘔惡。腹滿脹痛者。曰衝
胃。古法用五積散。余嘗用平胃加薑桂。往往効。不
應。送來復丹。嘔逆腹脹。血化爲水者。金匱下瘀血湯。
若面赤嘔逆欲死。曰衝肺。二味參蘇飲。甚則加芒硝。
蕩滌之大抵。衝心者十難救。一衝胃者五死。五生。衝
肺者十全一二。○產後口鼻起黑色而鼻衄者。是胃
氣虛敗而血滯也。急用二味參蘇飲。稍遲不救。

三急。○產後諸病。惟嘔吐盜汗泄瀉爲急。三者並見。必危。痰閉心廢。抵聖散去芍藥加炮薑茯苓。多汗加烏梅。慎不可用浮麥傷胃耗氣。棗仁膩滑作瀉。芍藥五味酸收。皆能阻滯惡露也。

三審。○凡診新產婦。先審少腹痛與不痛。以徵惡露之有無。次審大便通與不通。以徵津液之盛衰。再審乳汁行與不行。及乎飲食多少。以徵胃氣之充饒。必先審此三者。以脈參證。以證合脈。脈證相符。雖異尋常治之。必愈。脈證相反。縱無危候。必多變端。卽如產

後惡露常以彌月爲期。然間有六七朝卽淨者。又未
可以概論也。此雖產母稟質不同。而胎之所稟亦異。
如胎息壯盛。則氣血盡歸其子。瘀血自少。胎息孱弱。
則氣血涵養有餘。瘀血必多。亦有產時去多。產後必
少。產時去少。產後必多。勢使然也。曾見一婦。艱產異
常。三朝下一血塊。大小形色與茄無異。此後絕無瘀
血。惟小便如皂莢汁。其少腹畧無痛楚。良由艱產過
傷子宮。關閘廢弛。不能收斂。致其塊得下。世俗名兒
枕者是也。大抵常產之婦。開闔有權。既產之後。子宮

卽閉兒枕隨氣攻注碎作小塊續續而下所以綿延
日期此則全塊頓出自無淋瀝之患卽有餘血盡歸
溲便矣此後屢見數婦證雖大異尋常以意逆之其
理自若也產後血脫津傷大便自應艱澀每至五七
日始通無足怪也其有發熱譫語脈滑實者又當急
攻以救津液若兼少腹硬痛又當破瘀爲先產後三
朝每有寒熱蒸乳寒熱後乳汁大行此胃氣孚化雖
有餘病必無他慮如無寒熱而乳汁充然者血氣本
旺也若不寒熱無乳汁此營衛不調總無所苦急宜

當歸內補建中湯頻與調之。否則兩月後漸見寒熱。骨蒸而爲蓐勞之患矣。

嘔吐。嘔吐惡露不行。二陳加當歸。蓬朮。肉桂。乾薑。胸腹脹滿。多是傷食。二陳加丁香。不應加人參。炮薑。澤蘭。藿香。或抵聖散亦佳。如寒。理中湯加藿香。

呃逆。呃逆者。胃寒所生。產後氣血俱虛。風冷搏氣。而逆上。乃胃氣虛寒之極。最爲惡候。理中加丁香。古方以丁香。豆蔻。伏龍肝爲末。用桃仁。吳茱萸煎湯。調下一錢匙。如人行五里。再服。未應。急投參附。遲則不

救。

飽悶。○產後飽悶惡露不行。多因血逆。宜行瘀血爲主。如有塊上升。飽悶欲吐者。二陳湯加薑桂香附炮查蓬朮。塊不散。積久愈堅。琥珀黑龍丹。若惡露已淨而飽悶受氣也。沉香降氣散。若敗血傷於脾胃而腹脹嘔吐者。抵聖散加陵鯉甲肉桂。孕婦服安胎藥過多。或正產或半產後。經一兩月惡露未淨。此非敗血之比。宜導氣行血。若用止截。誤矣。飲食停滯。六君子加木香厚朴。大凡傷其脾胃者。當節飲食爲主。

識語○識語多有血滯亦有血虛著風而痰鬱者不
可專以痰斷亦不可認爲血逆其後識語必脈大有
力始與證合然又與產後不宜故多難治去血少者
血滯也實則桃仁承氣下瘀血湯虛則龍齒清魂散
或四烏湯用赤芍歸尾加桃仁薑汁去血多者血虛
也蓋血虛則心神失守故識語必先養血不可用參
朮峻補當歸內補建中湯當歸芍藥散膠艾湯選用
著風兼痰鬱者心經虛故風痰客之導痰湯加鈎藤
鈎薄荷又方益母草爲末薄荷湯爲丸童便服之專

治產後譫語

如見鬼神。○產後傷耗血脈。心氣虛。則敗血停積。上
干於心。遂至心中煩躁。卧起不安。如見鬼神。言語顛
錯。誤作風治。必殆。虛則四物湯換生地。加桂心。炮薑。
生蒲黃。石菖蒲。實則四烏湯加川連。煎成入龍腦一
捻。服後得睡。即安心。悸恍惚。語言錯亂者。千金遠志
湯。如內虛敗血攻心。狂言亂語者。龍齒清魂散。瘀積
不行。腹脹喘急者。急用下瘀血湯攻之。庶或可收。稍
遲。必難挽回。此證多有心脾血少者。宜八珍加炮薑。

則痰清神自安矣。

不語○產後不語多因停積敗血閉於心竅神志不能明了嚴氏清魂加蘇木丹參若因心腎氣虛而不能通於舌則舌強不語辰砂七珍散或人參石菖蒲等分不時煎服腎虛風熱地黃飲子肝木太過柴胡清肝散或小柴胡加鈎藤脾受木侮六君子加升麻鈎藤氣血俱虛八珍湯加菖蒲遠志不應獨參湯加附子一片峻補其氣而血自生若竟用血藥則誤矣發瘧○產後發瘧因去血過多元氣虧極或外邪相

搏或陰火內動所致。故傷寒汗下過多。潰瘍膿血大
泄。多患此證。須大補氣血。或保無虞。若攻風邪必死。
其證牙關緊急。腰背反張。四肢抽搐。兩目連劄。十全
大補有汗加炮薑。多汗加附子。不應并加薑附。倍人
參。多服始應。嘗治大虛之證。服參耆數觔。附子數枚。
方應。若汗拭不及。兩手漠空者不治。

發熱。婦人產後血虛。陽無所依。而浮散於外。故多
發熱。治宜四物補陰。而以炮薑之苦溫從治。收其浮
散。使歸於陰。若氣血俱虛。惡寒發熱。煩躁作渴。十全

太補湯若熱愈甚急加桂附若血虛至夜發熱小腹
腰脇作痛四物加黃耆五錢肉桂一錢若作渴而赤
當歸補血湯若誤認爲火證投以涼藥禍在反掌然
產後脾胃多虛有過於飲食傷滯而發熱者慎勿誤
作血虛治但遇產後發熱若胸膈飽悶噯氣惡食泄
瀉等證只作傷食治之若發熱而飲食自調者方用
補血正法○產後大發熱必用炮薑同茯苓淡滲其
熱一應苦寒并發表之藥皆不可用凡產後發熱惡
寒皆屬血虛此熱非有餘之熱乃陰虛生內熱耳故

以補陰藥加炮薑大劑服之。且炮薑能入肺胃散虛熱。入肝脾引血藥生血。然不可多用。獨用必與補陰藥同用。此造化自然之妙也。惡寒發熱腹痛者。當去惡血。○產後脈洪數。胎前脈濇弱多死。懷孕者脈宜滑數。已產而滑數不改者。雖未必死。多費調理。

寒熱○產後因氣血虛弱。脾胃虧損而發寒熱。皆不足證。經云陽虛則惡寒。陰虛則發熱。若兼大便不通。尤屬氣血枯槁。切禁發表降火。若寸口脈微爲陽氣不足。陰氣上入陽中而惡寒。補中益氣湯加薑棗發

起之尺部脈弦爲陰氣不足陽氣下陷陰中而發熱
六味凡加肉桂以收攝之若肌熱大渴引飲目赤面
紅此血虛發熱當歸補血湯不可誤認客邪而用表
散藥○下血過多寒熱而小腹不痛者此營衛虧損
陰陽不和屬虛增損四物湯若惡露未淨傷滯胞絡
寒熱而小腹痛者屬實輕則四烏湯重則醋煎散產
後卧不如法敗血流入經絡骨節間寒熱腰股腫熱
痛不可拊局方調經散有食消食頭痛骨疼寒熱者
外感風寒也參蘇飲增損柴胡湯柴胡四物湯選用

或兼瀉及吐者五積散。胸膈飽悶前後心痛寒熱者傷氣與食也。指迷七氣湯。虛人局方七氣合沉香降氣散。如飽滿寒熱兼腹痛腰疼者四烏湯。熱而不寒胸煩自汗與大病後虛煩相似此去血過多血虛生熱也。逍遙散若臍下熱非熟地不能治如大熱必用炮薑日晡轉甚者非柴胡不能治不應必用肉桂。新產蒸乳發熱不必服藥。

中風。產後類中風證大多血虛非真中也。或挾風或挾痰或挾氣證雖不一治法莫要於行血芎歸湯。

加荊芥穗淋黑豆酒煎服亦治角弓反張手足癱瘓
脈來虛浮者血暈四肢強直芍歸湯加重便或用荊
芥穗微焙爲末豆淋酒調下二錢或童便服之口噤
則挾齒灌之斷噤則灌入鼻中卽蘇手足癱瘓敗血
入經絡也用五積散又有形盛氣虛產後痿廢不起
者但當補氣藥中兼行氣爲主朝用香砂六君子暮
用越鞠丸久服自効

欬嗽○產後欬嗽多因腠理不密外邪所感而致若
因風寒所感桔梗湯加葱白香豉生薑或小建中湯

虛用異功散去木加山藥細辛桂枝陰虛兼感客邪者六味丸去茺加桂枝細辛陰虛水不制火而嗽六味丸加麥冬五味乾欬內熱不寒桔梗湯加萎蕤麥冬丹皮蜜煎薑橘之類蓋乾欬一證有小兒食乳易治無則成勞

發喘○喘而痰聲大作此痰犯肺金也。豁其痰喘自定。風則金匱旋覆花湯加甘草桔梗。惡露未淨加炮薑丹參。有食加厚朴陳皮。不嗽而喘此肺爲火迫。乃真喘也。難治。若肺虛熱生脈散爲主藥。肺胃氣虛異

功散加桔梗。兼外邪加細辛。中氣虛寒。前方加炮薑。
肉桂。陽氣虛脫。更加附子。腎虛不能納氣。歸元。都氣。
丸作湯送。靈砂丹。兼氣虛者。與異功散兼進。大抵產
後發喘。加以脈之虛大急疾。皆不可治。

癰癥。○產後陰血去多。陽火熾盛。筋失營養。虛極生
風。而成此證。若見唇青。肉冷。汗出。目眩。神昏。命在須
臾。四君子加芍歸丹皮。鈎藤。蓋血生於至陰。至陰者。
脾土也。若肝經血虛。逍遙散加鈎藤。陽氣虛敗。十全
大補加薑附。鈎藤。鈎經云。脾之榮在唇。心之液爲汗。

若心脾二藏虛極而脣白多汗急用參附救之若無力抽搐戴眼反折汗出如珠不流者皆不可治。

顫振○產後顫振乃氣血虧損虛火益盛而生風也。切不可用風爲治急用十全大補溫補氣血爲主。如小產後半身肉顫半身汗出亦宜上法若產後不省人事口吐涎沫而顫振或癰癰者當歸補血湯加荆芥穗豆淋酒煎服婦人胎前產後顫振癰癰逍遙歸脾小柴胡補中皆可選用。

傷風○產後傷風須問惡露淨否而後用藥若未淨

而小腹疼痛者以行血理氣爲先金匱旋復花湯四
烏湯選用若惡露已淨小腹不疼但頭痛身熱足冷
自汗欬嗽黃耆建中湯頭重香蘇散若風寒併傷營
衛俱病遍體痛無汗敗毒散虛甚著風者不可發散
逍遙去木加桂枝得効雖遲無失

傷寒○產後傷寒不可遽用小柴胡蓋有黃芩在內
停滯惡血也宜小建中湯增損柴胡湯時疫柴胡四
物湯香蘇散伏氣發溫葱白香薷湯感冒氣食香蘇
散產後得熱病四肢暖而脈息和平者生四肢冷而

脈沉澹煩熱甚而脈洪盛者皆死證也

瘧○產後瘧瘧在初產時絕少。卽胎前久瘧淹纏。產後裏氣通達。無不霍然。間有微寒發熱不止者。此衛氣向虛。營血驟傷之故。但與內補當歸建中湯。熱多倍芍藥。寒多加黃耆。夜發一倍當歸。三倍黃耆。不應加生何首烏。虛熱不止。大便不實。加炮薑茯苓。惡露不行。小腹結痛。另用炮黑山查。熬枯黑糖。伏龍肝湯煎服。或有產後一月半月。感犯風暑而瘧。小柴胡補中益氣選用。風加羌活紫蘇。暑加香薷厚朴。隨證裁

酌但黃芩苦寒無論惡露淨與未淨皆非所宜

痢。產後下痢有三。一者因胎前患痢產後不止。昔人以為七日必死之候。若元氣未敗脈有胃氣可進粥食者。伏龍肝湯丸隨證加減。多有得生者。一者因產後臍腹受冷飲食不化腹痛惡露不行。理中湯為主。白加吳萸木香赤加桂心茯苓。一者因產後誤食生冷或臨產飲食過度產後泄瀉下痢亦宜理中湯白加枳實茯苓厚朴木香赤加香附炮查熬糖虛加人參肉桂。間有熱痢下重白頭翁加甘草阿膠湯清。

理之惡露已淨。痢久不止。腹痛後重。補中益氣升舉
之大抵。產後下痢。惟宜顧慮元神。調和血氣。則積滯
自下。惡露自行。非若妊娠之有胎息。難於照顧也。
蓐勞。○蓐勞者。因產理不順。疲極筋力。憂勞心慮。或
將養失宜。虛風客之。致令虛羸喘乏。寒熱如瘧。百節
煩疼。頭痛自汗。肢體倦怠。欬嗽痰逆。腹中絞刺。當扶
正氣爲主。六君子加當歸。若脾肺氣虛。欬嗽口乾。異
功散加麥冬。五味。氣虛頭暈。補中益氣倍用歸耆。肝
經血虛。肢體作痛。四物加參。苓朮。桂肝腎虛弱。自汗。

盜汗往來寒熱六味丸加五味子脾虛血弱腹痛月經不調歸脾湯倍木香血虛有熱增損柴胡湯骨蒸勞熱嗽痰有紅者異功散去木加山藥丹皮五味阿膠童便熱而無痰乾欬逍遙散用蜜煎薑橘蜜蒸白朮產後虛損不時寒熱或經一二載元神不復月事不轉先與千金當歸芍藥湯後與烏骨雞丸調補大抵此證多因脾胃虛弱飲食減少以致疲憊而成當補脾胃進飲食則諸藏有所倚賴病自愈矣
虛煩○產後虛煩皆氣血虧損虛火上泛所致千金

治產後內虛煩熱短氣用甘竹茹湯產後乍寒乍熱
手足身溫心胸煩滿用知母湯產後虛煩頭痛短氣
悶亂不解用淡竹茹湯產後煩滿不安用人參當歸
湯俱孫真人法也

驚悸○產後心悸皆心虛所致千金治產後衝悸志
意恍惚言語錯亂用茯神湯虛熱口燥加麥門冬虛
加人參善忘加遠志麥門冬產後大虛心悸志意不
安恍惚恐懼虛煩不眠少氣人參圓吸吸乏氣善忘
本方去薯蕷加遠志亦孫真人法也

多汗。產後血虛身熱自汗。逍遙散加熟棗仁烏梅。不可用補氣藥。古方用麥煎散。治產後盜汗自汗。爲害不可勝數。因外感而汗者。黃耆建中湯。氣血俱虛。十全大補湯。不應加附子。若汗多不止。必發柔痙。尤當前藥若頭汗者。或因溼熱。或因瘀血。當審虛實。治之。半身汗出。昔人用二陳合四物。治多不効。以血藥助陰。閉滯經絡也。此屬氣血不充。而有寒痰留滯。非大補氣血。兼行經絡。痰不効。宜十全大補人參養營。加星半川烏。肥人多加豁痰行氣藥。瘦人氣血本枯。

天之徵也

麻脅○產後麻脅宜生血補氣十全大補湯去血過多手足發麻小腹大痛則遍體麻暈欲死此非惡露凝滯乃虛中挾痰六君子加炮薑香附當歸曾治一婦產後右半身麻脅而昏暈不省人事發即胸膈痞悶下體重著或時心神蕩搖若無心肺之狀頃則周身冷汗如瀉大吐痰涎而蘇此產後經脈空虛痰飲乘虛襲入之故因與六君子加歸耆肉桂隨手而効復有一婦產後左半身麻脅昏暈不省人事發則周

身大痛筋脈癰凝肌肉瞤動或時頭面赤熱或時腿
上振振動搔頃則蒸蒸汗出而餘此產後營血大虧
虛風襲入之故用十全大補湯治之諸證悉平但麻
膏不止後與地黃飲子而安

大小便諸證○產後去血過多大腸乾澀每至三五
日後甚至五七日而大便始通者皆其常也或血虛
火燥不可計其日期必待腹滿覺脹欲自去而不能
者乃結在直腸宜用導法蜜煎導或削薑薑醬瓜皆
可爲導惟猪膽汁導禁用以其苦寒誤用每致發呃

也。若用苦寒藥攻通，反傷中焦元氣，或愈結難通，或通瀉不止，必成敗證。若屬血虛火燥，四物加鮮何首烏潤下之氣，血俱虛之人，雖數日不通，飲食如常，腹中如故者，八珍加桃仁、蘇子、熟蜜，若多日不解，躁悶異常，不得已用人參、當歸、枳殼煎服，亦權宜之術耳。古人用玉燭散治之，反致危殆者多矣。至如產後日久，病外感熱結，有實邪燥屎者，急用承氣、大柴胡下之，又不常拘於此例也。小便不通，腹脹如鼓，用炒鹽加麝半字填臍中，外用葱白十餘莖作一束切如

半指厚。置鹽麝上。將艾灸之。覺熱氣入腹。難忍方止。小便卽通。此惟氣閉者宜之。若氣虛源涸。與夫熱結膀胱者。皆不可用。產母但覺小水少。此卽是病。便宜調治。如大小便俱秘。惡露不行。先通惡露。四烏湯加蓬朮。山查。如惡露不行。大便泄。小便難。五苓散倍肉桂。加桃仁。不可服胃苓湯。以蒼朮能止血也。○產後小便數。乃氣虛不能制水。補中益氣。加車前。茯苓。若膀胱陰虛。而小便淋瀝。生料六味。合生脈散。滋其化源。須大劑煎成。隔湯頓熱。續續進之。○產後遺尿不

知乃氣虛不能統血也。補中益氣湯。若新產延孔未
斂。溺出不知。此恆有之。至六七朝自止。不必治也。○
婦人產後。水道中出肉線一條。長三四尺。動之則痛。
欲絕。先服失笑散。數服。次用帶皮薑三觔。研爛。入清
油二觔。煎油乾。爲度。用絹兜起肉線。屈曲於水道邊。
以前薑熏之。冷則熨之。一日夜卽縮。二日卽盡。再服
芎歸湯調理。如肉線斷。則不可收矣。○產婦尿胞損
破。致病淋瀝者。當與峻補。丹溪云。難產多是氣虛。產
後氣血尤虛。當以參耆爲君。芎歸爲臣。桃仁陳皮爲

佐同豬羊脾煎湯時時飲之勿令間斷使氣血驟長
匝月其呼自完若稍緩則難成功矣○產間傷動脬
破終日不小便但淋瀝不乾用天然黃絲二兩不用
染者牡丹皮白芨人參各一錢水煎至絲爛如飴服
服勿作聲作聲則泄氣無効名補胞飲經月常服有
効○產後損尿胞而淋瀝參耆朮草熬膏豬羊胞煎
湯饑時調服月餘胞長淋止○產後陰戶著風痛四
物湯加藜本防風不應有瘀傷也加血餘龜版灰肉
桂陰頰脫下氣血俱虛不能收斂者八珍加升麻黃

著○陰戶腫痛淫熱也用枯礬荆芥白芷當歸桃仁
細辛川椒五倍子等分入葱三莖煎湯薰洗卽愈
諸痛○產後遍身疼痛氣虛百節開張惡露乘虛流
入經絡骨節之間謂之敗血流經或流於腰膝或流
入髀股痛不可耐痛處熱腫流注日淡漸致身面浮
腫局方調經散最常琥珀地黃丸亦宜若因虛風所
侵以致肢體沉重不利筋脈引急發熱頭痛局方用
五積散去蒼朮加陵鯉甲用生漆塗煨尤良或四神
散加桂枝薑棗和營止痛最捷若誤作傷寒發汗致

紅脈抽搐手足厥冷而變爲瘳又當十全大補爲主
若以手按而痛益甚者是瘀滯也四烏加陵鯉甲桂
枝薑棗以散之按而痛稍緩者此血虛也四物加香
附炮薑人參白术甘草以養之如皮肉痛者外感也
如月內惡露未淨者香蘇散加肉桂陵鯉甲產後五
藏皆虛胃氣虧損飲食不充則令虛熱陽氣不守上
湊於頭則令頭痛補中益氣加川芎香附子不應加
附子一片若血虛四物加參朮有產後敗血上衝頭
痛非琥珀黑龍丹不効又方治產後敗血作梗頭痛

諸藥不効用大附子一枚。醃醋一碗。用火四畔炙透。蘸醋令盡。去皮臍。加川芎等分。並爲末。每服錢半。或二錢。茶清調下。○偏正頭風作痛。川芎茶調散。去白芷。加細辛。黑豆淋酒煎。乘熱熏患處。候溫服之。如左半邊惡寒。腦後掣痛者。本方去白芷。加歸芍。右半邊畏寒。兩太陽引痛者。本方去白芷。加參耆。千金治產後中風頭痛。手臂逆冷。白朮三兩。附子一枚。獨活一兩。生薑三兩。豆淋酒煎服。婦人患頭風者。常居其半。每發必掉眩。如在車船上。皆因血虛。屈邪運動其痰。

二陳加當歸黃芩羌活防風不應加烏頭石膏挾氣
虛者必加黃耆然崩傷產後吐血衄血並令人眩暈
當隨所因而治○感氣而胃口作痛養胃湯因氣而
心腹痛降氣散感寒而痛甘草乾薑湯加焦白朮桂
枝有食積實理中加炮黑山查○產後惡血上攻心
痛爲陰血虧損隨火上衝心絡名心胞絡痛宜理中
加當歸產後惡露未淨胸腹作痛或小便不利琥珀
地黃丸溫散之產後心痛大寒嘔逆不食千金蜀椒
湯產後心痛乾嘔吐涎沫大岩蜜湯若真心痛旦發

夕死夕發旦死瘀血上衝用失笑散一錢童便調下
卽定血旣散而仍痛增損四物湯調補之○脇痛宜
分左右蓋左屬血血藏於肝肝傷有死血故痛小柴
胡去芩加丹皮香附薄桂當歸童便右屬脾脾有痰
積於脇則痛補中益氣去升麻加葛根半夏茯苓枳
殼生薑左右俱痛者屬虛補中益氣加桂下六味丸
○腹痛惡露已淨者下焦虛寒也六味丸加桂如痛
定於一邊及小腹者此是側臥敗血留滯所致四烏
湯加蓬朮有產後腹痛服上藥不應而喜溫喜按者

屬虛屬寒寒則理中加肉桂當歸虛則金匱當歸生
薑羊肉湯隨證加增神驗產後三日腹痛補中益藏
強力消血羊肉生地黃湯若腹中疝痛畏寒少食大
劑人參阿膠生薑煎服効此卽仲景當歸生薑羊肉
湯之變法也若痛而惡心或欲作嘔六君子加炮薑
有瘀加莪茂桃仁炮黑山查若泄瀉腹痛後重補中
益氣加木香炮薑若胸膈飽脹或惡食吞酸或停惡
露至夜發熱識語腹痛手不可按此是飲食所致當
用二陳加枳朮查肉虛人枳實理中加肉桂炮查發

熱腹痛。按之痛甚。不惡食。不吞酸。此是瘀血停滯。四
烏湯加蓬朮肉桂。若止是發熱頭痛。或兼腹痛。按之
却不痛。此是血虛。四物加艾附。著桂。若腹痛脇脹。此
氣寒。不能溫養肝血。當歸乾薑香附肉桂丹皮茯苓
入鹽少許。熱服。產後下血不盡。腹內堅痛。不可忍者。
甘草乾薑當歸芍藥桂心桃仁山查煎服。產後少
腹作痛。俗名兒枕塊。古法用失笑散及四物加莪茂
山查。產後崩中去血。赤白相兼。或如豆汁。千金伏龍
肝湯能溫脾胃涼肝血。其効如神。若惡露既去而仍

痛四神散調補之。小腹痛當視去血多少。如敗血凝滯有塊而痛者。醋煎散無塊者。四烏湯。須看人虛實酌用。產後臍腹作痛。冷氣乘虛也。內補當歸建中湯。產後腰痛者。因產勞傷腎所致。十全大補湯加附子。產後惡露漸少。忽然不來。腰中重痛。下注兩股。痛如錐刺入骨。此由敗血流滯。經絡不卽通之。必發癰疽。局方調經散加陵鯉甲水煎。日三服。以痛止爲度。琥珀地黃丸亦宜。下瘀血湯代抵當丸皆可取用。切勿誤用五積散等辛溫之藥。丹溪云。局方五積散。

治產後瘀血作痛以蒼朮爲君麻黃爲臣厚朴枳殼
爲使雖有歸芍之補血僅及蒼朮三分之一不思產
後之婦有何寒邪血氣未充似難發汗不過借藥性
溫和可以推陳致新豈可用麻黃之悍蒼朮厚朴之
燥乎虛而又虛禍不旋踵矣

泄瀉○產後泄瀉其因有五一者因胎前泄利未止
產後尤甚一者因臨產過傷飲食產後滑脫一者因
新產驟食肥腥不能尅運一者因新產煩渴恣飲水
穀混亂一者因新產失護臍腹藏府受冷其致瀉之

由雖異一皆中氣虛寒傳化失職之患。竝宜理中湯
爲主食。加枳實。山楂。水。加桂心。茯苓。虛。加桂附。倍參。
寒。加桂附。倍薑。久瀉腎虛。加桂心。熟附。瘀結不行。加
炮查歸身。若見完穀不化。色白如糜。此脾胃大虛。元
氣虛脫之候。十有九死。惟猛進溫補之劑。庶可挽回。
卽有煩躁發熱面赤脈來數大。皆虛火上炎之故。當
并進桂附人參甘薑苓朮之類。伏龍肝煮湯代水煎
服。仍得收功。若小便混濁如泔。或大便中有白沫如
腸垢者。乃元氣下陷之故。並宜補中益氣。加桂苓炮

薑升舉之。或臭水不止。加蘼艾香附。吳茱萸。若兼瘀結不通。腹脹喘急。神丹不能復圖也。

浮腫。○腫脹腹大筋青。小便不利。必食生冷。傷滯瘀血也。若用利水藥。病必轉劇。理中湯加木香。肉桂。蓬朮。身腫或腹大如鼓。四七湯加木香。嗽者忘木香。用炮薑灰。面腫下不腫。屬風。宜發散。紫蘇飲加防風。下腫上不腫。屬溼。宜利小便。紫蘇飲加木通。四肢與頭面腫甚。氣食也。紫蘇飲加消導藥。有血兼破血藥。停血不散。腹腫喘滿。夜甚於晝。四烏湯加蓬朮。若足忽

腫者乃溼熱注病。恐成脚氣。當歸拈痛湯。若紅腫而痛。恐生腫毒。則以膚熱與不熱爲辨。○產後敗血乘虛停積。循經流入腿脇。留滯日深。故令面目四肢浮腫。宜調血爲主。醫者不識。便作水氣治。以導水之藥。必危。夫產後旣虛。又以藥虛之。是謂重虛。往往多致夭枉。但多服局方調經散。或四神散。加蓬朮。桃仁。肉桂。穿山甲。血行腫消。則愈。陳無擇云。若風邪乘於氣分。皮膚腫而浮虛。乃邪氣有餘也。若皮膚腫其形色如熟李者。乃水也。水腫者宜利小便。氣腫者宜發汗。

諸血。○產後鼻衄乃氣血逆行所致。紫蘇飲入童便。荊芥灰如口鼻黑氣起而衄者難治。初產時口中血。溢出暴或吐血嗽血名血氣衝心。四物加延胡木香。炮薑產久惡露已淨吐咯瘀血者治與平人同。產後血崩因經脈未復而勞碌惱怒或犯房事多成此候。若小腹滿痛肝經已傷最爲難治。若血滯小腹脹滿。四烏湯加蓬朮肉桂血少小腹空痛四物加丁香膠艾。肝火迫血妄行加味逍遙散脾鬱不能統血加味歸脾湯脾虛不能攝血補中益氣湯厚味積熱傷血。

清胃散加炮杏。風熱相搏傷血。四君子加防風枳殼。
惡寒嘔吐。大便秘瀉。六君子加炮薑。下焦虛寒不能
統血。漏下色晦。及瘀淡不止。千金芎藭湯。鹿茸散。選
用。

月水不通。○乳子過歲而乳母經行。是其常也。若兒
半歲而母經行。有血盛血熱之分。血熱者宜涼血。四
物加續斷條芩。不乳者不在此例。若兒二三歲。其母
經不行而無疾。不必服藥。若肢體倦怠。食少內熱。是
血少也。宜逍遙散加參耆。以健脾胃。若以藥通之。則

誤矣。若脾胃虛弱，六君子湯加當歸。若兼鬱火傷脾，歸脾湯加丹皮、山梔。若怒火傷血，柴胡四物湯。氣血俱虛，八珍湯加丹皮。

諸淋。○淋因熱客於脬，虛則頻數。熱則澀痛。氣血兼熱，血入胞中，則血隨小便出而爲血淋也。若膀胱虛熱，六味丸。若陰虛而陽無以化，腎氣丸。蓋土生金，金生水，當滋化源。若少壯元氣實強者，用滑石通草車前葵子瞿麥蒲黃漿水煎服。

乳汁。○產後三朝五更發寒熱，名曰蒸乳。若產後乳

雖腫而響作者須服清利之藥則乳自行仍以美臙引之○產後乳汁自出不止乃胃氣虛宜服五味異功散加黃蓍五味以攝之若乳多滿急痛者用溫帛熨之○新產兒未能吮乳乳汁蓄結與血氣相搏而壯熱大渴通乳服硬掣痛名曰妬乳當以手搏去宿乳或吮去尤妙并以貝母栝蘂實甘草節水通煎服初產因子不育蒸乳而發寒熱作痛者俗名乳膨用斷乳法以四烏湯加炒麥芽一兩卽止不然恐內結成癰多致潰膿亦有乳囊潰而成危候者不可不知

○若有子而乳不下者通草八錢黃豬蹄湯飲之白
蝦汁亦妙乳母氣血虛而不能蒸乳八珍湯加黃耆
麥冬肺胃虛寒而乳不通者千金鍾乳湯寒熱不均
氣道阻逆而乳不通者麥門冬散有熱去鍾乳加漏
蘆因怒火者逍遙散加參耆麥冬之類凡產不蒸乳
者後必有變須預言之元氣壯實者不在此例○吹
乳腫痛速用栝蒌實一枚連穢搗爛甘草節一寸乳
香一錢煎成加溫酒服服後側卧於床令藥氣行外
以天南星生末醋調敷以手揉之自散

瘡

金匱云少陽脈滑而數者陰中生瘡陰中蝕瘡爛者
狼牙湯洗之

少陰脈滑而數熱結下部也治用狼牙煮湯纏著
如繭浸瀝陰中日四遍以解毒殺蟲但用一味以
取專功蓋此證多患於痿寡證必欬逆經閉骨蒸
寒熱凡見煩赤中有白斑下脣紅中白點皆陰蝕
之候雖用上法及服降火滋陰藥終歸必亡此情
志之病非藥可治故仲景但用外法絕不及於湯

藥厥有旨哉

胃氣下泄。陰吹而正喧。此穀氣之實也。豬膏髮煎導之。

導之者。服之使病從小便而出。非外用導引之謂。詳陰吹正喧。婦人恆有之疾。然多隱忍不言。以故方書不載。醫不加察。金匱明言胃氣不清。穀氣之實。所以腹中喧響。則氣從前陰吹出。如矢氣之狀。第用豬膏髮煎之治。難於推測。近余治一僕人之婦。經閉三月。少腹痛貫徹心。而見前證不已。與失

笑散一服瘀血大下遂不復作又治一貴顯之婦
小產後寒熱腹痛亦有前證與炮黑檀肉熬焦黑
糖爲丸用伏龍肝煮水澄清煎獨參湯送三錢一
服結糞大下再進瘀血續行而前證頓止始悟豬
膏髮煎皆爲逐瘀而設雖皆未用其方而實不離
金匱之法也

瘰癧○婦人瘰癧多因憂思鬱怒傷損肝脾累累然
如貫珠多生於耳之前後項側胸脇間若寒熱腫痛
乃肝經氣鬱而爲病不可峻用痰藥加味道遙散若

寒熱既止而核不消乃肝經之血亦病四物湯加白
朮茯苓柴胡丹皮若飲食減少經事不調爲脾胃虧
損六君子加香附丹皮柴胡當歸若初生如豆粒附
著於筋肉色不變而後漸大腫痛內熱口乾精神倦
怠久不消癢乃肝脾虧損逍遙散歸脾湯健脾土培
肝木切不可輕用散堅追毒之劑誤下之必犯病禁
經禁若久潰脈浮大邪火盛也面色皎白金剋木也
皆難治○凡風木之病但壯脾土則木自不能剋矣
若行伐肝則脾胃先傷而木反來侮土矣

結核。婦人結核皆因鬱怒虧損肝脾觸動肝火所致。非但婦人多鬱患此。則小兒胎中受母氣之鬱。生後至七八歲外。往往有之多。結於項側耳前後。或發寒熱。屬膽經風熱。怒火。柴胡清肝散加鉤藤山梔以清肝火。若結於肉裏。其色不變。晡熱內熱。屬肝火血虛。加味逍遙散。或結於肢節。或累累如貫珠。其色不變。亦肝火血燥而筋攣急。小柴胡加鉤藤佐以六味丸。若時消時作。此氣滯而痰結也。用歸脾六君二湯以調和脾胃之氣。外用一味香附末唾調作餅艾灸。

乾卽易之勿令傷肉常灸自消丹方治痰核用貝母
全蠍連皮胡桃肉各百枚同搗蜜丸空心口服彈子
大二三丸効又方用羯羊角磁片刮下爲末或舊明
角琉璃刮下爲末尤良每觔入貝母四兩全蠍二兩
蜜丸空腹服三錢外用皂莢肉入鯽魚腹中煨灰存
性蜜和醋調塗大効若潰而肉不腐或肉不生或膿
水清稀肌寒肉冷白汗盜汗寒熱內熱面色痿黃食
少體倦便利不調者五藏皆虛也但用補中六君益
氣養營等湯調補脾胃則各證自退故經云氣傷痛

形傷腫慎不可輕用行氣破血之劑

流注。婦人流注多因憂思鬱怒虧損肝脾以致營氣不從逆於肉裏或因腠理不密外邪客之或溼痰流注或跌撲血滯或產後惡露凝積蓋氣流而注血注而凝或生於四肢關節或留於胸腹腰髖或結塊或漫腫皆屬鬱火急用葱熨法內服益氣養營湯米成自消已成自潰須久服無間自然收功若久而腫起作痛肢體倦怠病氣有餘形氣不足尚可調治若漫腫微痛屬形氣病氣俱不足最爲難治或不作膿

或膿成不潰氣血虛也人參養營湯憎寒畏寒陽氣
虛也十全大補湯肺熱內熱陰血虛也四物加參朮
作嘔欲嘔胃氣虛也六君子加炮薑食少體倦脾氣
虛也補中益氣加茯苓半夏四肢逆冷小便頻數命
門火衰也八味丸小便頻數痰盛作渴腎水虧損也
六味丸加麥門冬月經過期多日不止肝脾虛也八
珍加柴胡丹皮凡潰而氣血虛弱不斂者十全大補
煎膏服之久潰而寒邪凝滯不斂者豆豉餅祛散之
其潰而內有膿管不斂者用藥腐化之若不補氣血

不節飲食不慎起居不戒七情或用寒涼尅伐俱不治

乳癰乳巖。婦人乳癰有內吹外吹上逆下順之異。總屬膽胃二經熱毒氣血凝滯故初起腫痛發於肌表肉色焮赤其人表熱發熱或發寒熱或憎寒頭痛煩渴引飲加味逍遙散加栝蒌霜若至數日之間膿成滿窠潮熱湧出膿盡自愈若氣血虛弱或誤用敗毒久不收斂膿清脈大非大劑開鬱理氣溫補氣血不能收功。丹方治乳癰初起用蒲公英草搗汁和

陳酒服以滓敷腫處卽消。然此施於蒸鬱之人輒効。若高粱七情內鬱所致者。良非所宜。當用鹿角磁條刮屑加麝香溫酒調服。若肥盛多痰鬱滯者。用橘皮搗碎如豆大湯泡淨。以飛羅麪拌炒去麪爲末。黑糖調二錢。醇酒服之。又方用蟹殼煨存性。醇酒服三錢。又乳房癰腫。用貝母枯。麝寶。甘草節各三錢煎服効。已潰加忍冬一兩佳。○乳巖屬肝脾二藏久鬱氣血虧損。故初起小核結於乳內。肉色如故。其人內熱夜熱。五心煩熱。肢體倦瘦。月經不調。益氣養營湯加味。

逍遙散多服漸散氣虛必大劑人參專心久服其核
漸消若服攻堅解毒傷其正氣必致潰敗多有數年
不潰者最危潰則不治周季芝云乳癰乳巖結韃未
潰以活鮑魚同生山藥搗爛入麝香少許塗塊上覺
癢極勿搔動隔衣輕輕揉之七日一塗旋塗漸消若
荏苒歲月以致潰腐漸大類巖巖色赤出水深洞臭
穢用歸脾湯等藥可延歲月若誤用攻伐危殆迫矣
曾見一婦乳房結核如杯數年諸治不効因血崩後
日服人參兩許月餘參盡二劬乳核霍然

陰瘡

○婦人陰瘡。乃七情鬱火。傷損肝脾。溼熱下注。其外證。有陰中舒出如蛇。俗呼陰挺。有翻突如餅。俗呼陰菌。亦有如雞冠。如鼠乳。亦有生諸蟲。腫痛溼癢。潰爛出水。脹悶脫墜者。其內證。口乾內熱。體倦。經候不調。飲食無味。晡熱發熱。胸膈不利。脇腹不調。小腹痞脹。赤白帶下。小水淋瀝。其治法。腫痛者。四物加柴胡。山梔。丹皮。膽草。溼癢者。歸脾湯加山梔。柴胡。丹皮。淋瀝者。龍膽瀉肝湯加白朮。丹皮。潰瘍者。加味逍遙散。腫悶脫墜者。補中益氣加山梔。丹皮。佐以外治之。

法可也。若陰中有蟲。癢痛。乃肝經溼熱。此惟獨陰無陽。鬱火內蘊所致。患此者。必骨蒸潮熱。經水不調。乾欬吐紅。面赤聲啞。雖日用開鬱降火之藥。多不能愈。大抵五志之病。非藥可醫。而失合證治。尤難外治之。法以桃仁研膏。和雄黃末。輕粉塗猪肝。納陰中。并用肥湯煎苦參洗滌。或以鯽魚膽塗之。然旋治旋發。如菌帶生蟲。不腐不止。又有交接時。輒出血作痛。此肝傷而不能藏血。脾傷而不能攝血也。多用加味逍遙散。加肉桂。或歸脾湯下。加減八味丸。自愈。

嬰兒門上

脈法

小兒三歲已內看虎口食指寅卯辰三關以驗其病。脈紋從寅關起不至卯關者易已若連卯關者難愈。若寅侵卯卯侵過辰者最劇其脈紋見五色如因驚必青熱則赤風熱瀉利色紫當以類推之又紋色顯而有縈紆者爲有胃氣易治紋色細淡而直如刀刃者乃正氣之虛難治紋上另有一點如流珠者爲宿食紋傍另有一條如絲縷者爲風痰紋斜向內者易

已斜向指甲者難愈。三歲後則以一指轉側辨其脈。五六歲後脈六七至爲平脈。浮爲風。浮大而數爲風熱。沉細爲寒。沉濇爲傷食。伏結爲物聚。微細爲疳積。爲腹痛。浮而洪爲有熱。浮而遲爲有寒。弦急爲氣不和。促結爲虛驚。脈亂不治。此論脈之大端也。

面目證

左腮屬肝。右腮屬肺。額上屬心。鼻屬脾。頤屬腎。青主驚積不散。紅主痰積驚熱。黃者食積癥癖。白主泄瀉。水穀黑主腎氣受傷。目內赤者心實熱。淡紅者心

虛熱。青者肝實熱。淡青者肝虛熱。黃者脾實熱。白而
混者肺實熱。目無精光者腎虛也。若目無大眚者五
藏皆不滿。兒多不育。

五藏虛實寒熱

心主驚。實則呌哭。發熱。飲水而搐。虛則困卧而悸。心
熱則合面睡。或上竄咬牙。心氣實則喜仰卧。肝主
風。實則面青目直。呌哭壯熱。項急頓悶。虛則咬牙呵
欠。肝熱則手循衣領及亂捻物。壯熱飲水喘悶。肝有
風則目連劄。得心熱則發搐。或筋脈牽緊而直視。肝

熱則目赤兼青則發搐風甚則身反張強直○脾主困實則身熱引飲虛則吐瀉生風若面白腹痛口中氣冷不思飲食或吐清水者脾胃虛寒也呵欠多睡者脾氣虛而欲發驚也○肺主喘實則悶亂氣急喘促飲水虛則哽氣出息肺熱則手掐眉目鼻面肺盛復感風寒則胸滿氣急喘嗽上氣肺藏怯則唇白若悶亂氣阻喘促哽氣者肺虛而邪實也○腎主虛皆胎稟虛怯神氣不足目無精光面白顫解此皆難育雖育不壽或曰畏明下竅者蓋骨重則身縮也咬牙

皆腎水虛而不能制心火也。惟痘瘡有實則黑陷證。乃邪火亢盛。非正氣之實也。

變蒸

小兒變蒸。變者變其情智。蒸者蒸其血脈。大抵三十
二日爲一變。每經變畢。則情智異常。全嬰方論云。變
蒸者。以長氣血也。變者上氣。蒸者發熱。輕則體熱虛
驚耳冷。飢冷微汗。唇生白泡。三日可愈。重者寒熱脈
亂。腹疼啼叫。不能乳食。食卽吐。五七日方愈。變蒸之
時。不欲驚動。當其時有熱微驚。慎不可治。及灸刺。但

孰視之若良久不已少與紫丸微下熱歇便止若於
變蒸之中加以時行溫病或非變蒸而得時行病者
其證皆相似惟耳及尻通熱口上無白泡當先服黑
散以發其汗汗出溫粉粉之熱歇便瘥若猶不除乃
與紫丸微下之小兒稟虛之所不免勿藥可也嘗見
小兒變蒸發熱有痰投以抱龍丸卒至不救若不熱
不蒸畧無證候而胎變者稟氣壯實故也

胎證

小兒胎證謂胎熱胎寒胎黃胎肥胎弱是也胎熱者

生下。有血色。旬日之間。目閉面赤。眼胞腫。啼叫驚煩。壯熱。溺黃。大便色黃。急欲食乳。此在胎中受熱。及膏粱內蘊。宜用清胃散之類。胎寒者。初生面色晄白。啼聲低小。或手足攣屈。或口禁不開。此母氣虛寒。或在胎時。母過食生冷。或感寒氣。宜用五味異功散之類。胎黃者。體目俱黃。小便秘澀。不乳啼叫。或腹膨泄瀉。此在胎時。母過食炙煨辛辣。致生溼熱。宜用瀉黃散之類。胎肥者。肌肉稟厚。目睛粉紅。彌月後漸瘦。五心煩熱。大便不利。口吻流涎。此受母之胃熱所致也。乳

母服大連翹湯兒亦飲少許以疏利之。胎弱者面無
精光肌體瘦薄身無血色大便白水時時哽氣及臍
因父氣不足者六味地黄丸。因母氣不足者八珍湯。
母子並服。近世初生小兒槩與化毒丹及黃連犀角
貝母甘草硃砂之屬。殊不知此惟身面皆赤胎稟多
熱毒者爲宜。若身面皆白胎稟虛寒本來少毒者服
之反伐其始生之氣。多致夭枉。當用連皮胡桃肉三
枚。研極爛。椒鹽核三枚。燒存性。明雄黃研細。水飛淨。
三分甘草煎濃汁。和生白蜜數匙。研勻。攪去滓。時時

服引出腎藏之毒。嘗見服此者。多不出痘。卽出亦稀。而無苦寒傷胃之患。可不辨虛實寒熱。而漫投化毒之劑乎。

胎毒

小兒初生。其身如有湯潑火傷者。皆母過食膏粱所致。母服清胃散。迢迢散。清其氣血。兒亦常飲數滴。有身無皮膚。而焮赤發熱者。皆由產母胃中火盛也。用熟石膏末。加珍珠粉撲之。亦有因父遺毒所致。當從微瘡毒治。夏月以兒卧蕉葉上。尤良。有身無皮膚而

不歛赤者。皆由產母脾肺不足也。以參耆朮加珍珠粉撲之。脾主肌肉。肺主皮毛。故知病脾肺也。子母俱服保元湯。如腦額生瘡者。火土相合。溼熱攻擊。髓海也。難治。脚上有瘡者。陰虛火盛也。不滿五歲而死。如未滿月而撮口握拳腰軟者。此肝腎中邪。勝正弱也。三日內見者。必不治。如男指向裏。女指向外。尚可治。鈎藤散主之。

禁風撮口。臍風。

小兒初生。禁風者。胎中受熱。毒流心脾。生下復爲風。

邪所搏。致眼閉口噤。帝聲不出。舌上如粟。口吐白沫。七日內見者。百無一生。○撮口者。因胎熱兼風。自臍而入心脾。致面目黃赤。氣息喘急。聲不出。舌強唇青。口撮腹脹。急於額門灸七壯。灸之不哭。弔腸吐沫者。不救。○臍風者。因斷臍之後。爲水溼風邪入於心脾。致腹脹臍腫。四肢厥直。啼不吮乳。甚則撮口發搐。七日內患者。最危。宜用麝香。麝尾。銅絲。輕粉。辰砂。爲散。薑湯調服。若臍邊青黑。撮口噤。是爲內搐。不治。若齒齦有泡。如粟。挑破。卽開。不必用藥。

急欲乳

急欲乳不能食者。此風邪由臍而蘊心脾。致舌乾唇燥。不能吮乳也。因外邪而唇口撮緊者。名臍風。多不可救。若心脾有熱。舌尖痛不能吮乳者。以柳華散敷之。目閉口噤。啼聲不出。吮乳不得而吐沫者。辰砂膏塗乳。令兒吮之。若舌下腫如小舌者。或舌絡牽痛。或齒齦患白星。俱用線鍼刺出毒血。亦敷柳華散。凡鍼重舌。以鍼向外橫挑底尖細脈。不可傷其本絡。輕則言語不清。重則血出而死。若暴病發熱。作渴飲冷。口

舌生瘡。大便秘結。瀉黃散。若病後發熱。口渴飲湯。大便不實。異功散。或口角流涎。或痰氣壅盛。脾不能攝也。六君子湯。若兒自食甘肥。或母食酒麪。致兒口舌生瘡。清胃散。

手足

脾藏虛熱。令舌絡牽緊。時時微露。而卽收者。名弄舌。屬心脾虧損。溫脾散。有熱。人參安胃散。舌舒長而良久不收者。名吐舌。乃心脾積熱。或兼口舌生瘡。作渴飲冷。屬胃經實熱。並用瀉黃散。若飲水者。脾胃虛而

津液少也。兼面黃肌瘦。五心煩熱者。疳瘦也。胡黃連丸。大病未已而弄舌者凶。

遊風猴疳

丹瘤之證。俗名遊風。因胎毒客於腠理。搏於氣血。發於皮膚。其赤暈遊走者。乃血隨風熱也。若發於胸脇。遊走四肢者。輕發於頭面四肢。延及胸背脇腹者。重。○千金云。赤遊風腫若綿。身人心腹者。卽能殺人。伏龍肝爲細末。雞子白和傳。勿令乾。或加髮灰。豬膏傳之。古人云。從四肢起入腹囊者。皆不治。當令人用力。

於各患處遍吮毒血各聚於一處急砭出之內服小劑活命飲惟百日内禁食若肚腹膨脹二便不通毒入內也用大連翹湯亦有生者或用雄黃二分硃砂一分水飛生蜜水調勻隔湯溫熱常服數匙得瀉其毒便解在小腹脇上陰囊等處忽紅腫如霞流行不定不止一處者用白殭胡桃七箇連殼剉碎大川連一錢五分生甘草節去皮二錢水煎噴熱陸續勤服鄉村不便醫藥者以生萊菔搗汁塗之亦可灌服數匙更以萊菔滓絹包烘煖裹紅腫處○猴疔者狀如

圓癰色紅從醫而起漸及遍身四圍皮脫中露赤肉
醫疔若猴之狀乃胎中毒邪畜於腎藏而發不急治
必死用大川連生甘草各六分乳香沒藥並炙雄黃
水飛各四分青黛研淨硃砂水飛各分半西牛黃一
分各爲細末和勻每服分半蜜調燈心湯下日三夜
二服外用淨青黛二錢黃蘗末微炒閉口連翹炒黑
人中白火煨醋淬各一錢土貝母去心炒褐色五錢
爲末和勻臨用入西牛黃冰片各半錢麻油調傅神
効

胎驚

小兒胎驚者。因妊娠飲酒忿怒驚跌。或外挾風邪。內傷於胎。兒生下卽病也。若月內壯熱。翻眼握拳。噤口出涎。腰強。搐掣驚怖。啼叫。顫縮。顫開。頰赤。面青。眼合者。當疎風利驚。化痰調氣。及貼顫法。若面青。拳搐。用鈎藤散。切不可誤作脾風。妄用溫藥。若眉間色赤。或虎口指紋曲裏者。可治。鈎藤散加全蠍。若眉間青黑者。不治。大抵小兒藏府脆弱。不可輒用銀粉鎮墜之劑。反傷真氣。多致不救也。

目睛瞤動

目者肝之竅也。肝膽屬風木二經。兼爲相火。肝血不足。則風火內生。故目睛爲之瞤動。經曰。曲直動搖。風之象也。宜四物湯滋其血。柴胡山梔清其肝。陰血內營。則虛風自息。兼用六味丸以滋其源。若愈後驚悸不寐。或寐中發搐。呀牙目睛瞤動者。血虛不能榮筋脈也。補中益氣倍歸耆。凡病氣有餘。皆屬元氣不足。況此證兼屬肝脾。多爲慢驚之漸。尤當審之。

唇口蠕動

膚爲脾之華。陽明之脈環膚而交人中。是以脾胃虛者。多有此證。不獨病後而已。夫脾主涎。脾虛則不能收攝。多兼流涎。或誤認爲痰。而用祛逐之藥。則津液益枯。不能滋養筋脈。遂致四肢抽搐。病勢愈甚。原其治法。與慢脾風相同。當大補脾胃。六君子加升柴。切禁青皮龍膽草伐肝之藥。若兼四肢微搐。或潮熱往來。或泄瀉嘔吐。面色痿黃。皆脾胃有傷也。加黃耆當歸白芍。若脾氣下陷。而肝木侮之。當補中益氣。以升其陽。加苓半芍藥。制肝補脾。切不可用疎風治驚之

藥

發搐

驚癇發搐。多因乳母鬱怒傳兒。胎中受患。或生後乳傷。驚恐致病。證多吐乳面青。若痰實乳積。則壯熱面紅。當兼調治其母。切不可損其元氣。驗其順逆。男則握拳。拇指叉入食指中爲順。於外爲逆。女則叉入食指爲逆。於外爲順。凡小兒忽然驚搐。目直者皆肝經風熱。若肝虛生風。則目連劄而不搐。及多呵欠咬牙。若肝經風實。則目直大斗。呵欠煩急頓悶。若肝經有

熱則目直視不清。得心熱則搐。其證平循衣領及亂
捻物。宜瀉肝熱爲主。凡病之新入。皆能引動肝風。風
內動。則上人於目。故目爲之連。劄若熱入於目。牽其
筋脈。兩眦俱緊。不能轉視。故目直也。亦有飲食停滯
中焦。致清陽不升。濁陰不降。肝木生發之氣不得升
致生虛風者。若胸滿腹痛。嘔吐惡食。輕則消導化痰。
重則探吐攻積。更須審其所傷。寒物熱物。亦有因感
冒吐瀉。致土敗水侮而生虛風者。不可遽服驚藥。若
輒用之。反成其風而益其病矣。○潔古云。傷風發搐。

當辨有汗無汗。用大青膏。小續命分治。薛按前證。若口中氣熱。搐而有力。屬形病俱實。宜大青膏以散風邪。若口氣不熱。搐而無力。屬形病俱虛。宜異功散以補脾土。六味丸以滋肝木。鉤藤飲以清肝火。因風邪鬱熱而變諸證。當理肺經清風邪。若外邪既解而諸證不愈者。當實脾土。補肺金。若竟治其風。恐脾氣復傷。諸證蜂起矣。若傷食後發搐。身溫多腫。或吐不思食。宜先定搐。搐止白餅子下之。後與秘旨安神丸。若飲食停滯。嘔吐不食。腹脹便秘者。屬實熱。白餅子下。

之。若下後。搐熱益甚。嘔吐不食者。屬虛熱。異功散補之。若脾胃既傷。肝火所勝。六君子加鈎藤鈎以健脾胃。平肝木。大凡飲食既消而不愈者。但調補脾胃。則諸邪自退。○百日內發搐。眞者不過兩三次必死。假者頻發不死。眞者內生驚癇。假者外傷風冷。血氣未實。不能勝任。故發搐也。口中氣熱。大青膏及塗顙法。并用大青膏加白礬。取三錢入桃枝一握煎水浴之。勿浴兒背。此卽浴體法也。前證多因胎中受惠。或乳母鬱怒傳兒。或兒脾傷自病。當固元氣爲主。凡搐頻。

者風在表易治宜發散。搐稀者風在藏難治宜補脾。

癰癩

錢仲陽云小兒發癰因氣血未充神氣未實或爲風邪所傷或爲驚怪所觸亦有因乳母七情驚怖所致。若眼直目牽口噤流涎腹膨搐弱背項反張腰脊強勁形如死狀或一時二時醒若反折上竄其聲如雞屬肝抽搐有力爲實邪柴胡清肝散大便不通者瀉青丸陰虛地黃丸若目睛吐舌其聲如馬屬心發熱飲冷爲實熱硃砂安神丸發熱飲湯爲虛熱辰砂妙

香散若目直腹痛其聲如牛屬脾若發熱抽掣仰
面色光澤脈浮病在府爲陽易治加味導痰湯身冷
不搐覆卧面色黯黑脈沉病在藏爲陰難治六君子
加木香柴胡若驚跳反折手縱其聲如羊屬肺面色
痿黃者土不能生金也五味異功散面色赤者陰火
上衝於肺也地黃丸若肢體如尸口吐涎沫其聲如
緒屬腎地黃丸用紫河車膏代蜜丸服腎無瀉法故
悉從虛治凡有此證先宜看耳後高骨間有青紫紋
爪破出血可免其患此皆元氣不足之證須常用六

味九加鹿角膠或八味丸用鮮河車膏代蜜以助先天更以六君子補中益氣以助後天設若泛行剋伐復傷元氣則必不時舉發久而危殆多致不救凡癰癩虎口脈亂乃氣不和也脈紋見有五色由其病甚色能加變至於純黑者不可治也

睡中驚動

小兒睡中驚動由心腎不足所致蓋藏府脆弱易爲驚恐夫人之神氣寤則行於目寐則棲於腎今心腎既虛則不能寧攝精神故睡中驚動也治宜清心安

神亦有驚嚇而作者。因驚動其肝。故魂不安也。宜抱龍丸以豁痰鎮驚。若食鬱生痰。驚動不安者。用四君子以健脾。加神麴半夏以化痰。山梔柴胡以清熱。

目動咬牙

小兒驚後目微動咬牙者。皆病後亡津液。不能榮其筋脈也。亦有肝經虛熱生風者。宜審其氣血有餘不足而治之。其目中發熱飲冷而動者。氣有餘也。瀉青丸夜間盜汗及睡不寧而動者。血不足而肝腎有熱也。地黃丸。或因肝經風邪傳於脾腎者。亦令咬牙先

用柴胡清肝散。次用五味異功散。六味地黃丸。若因脾胃虛熱。補中益氣加芍藥。山梔實熱瀉黃散。以牙齦屬手足陽明故也。

搖頭便血

經曰。諸風掉眩。皆屬於肝。肝屬木。木得風則搖動。乃肝經火盛而生虛風也。便血者。風木搖動。則土受凌虐而不能統血也。或因乳母恚怒。風熱熾盛。肝木傷脾。使清陽不升。亦有風邪侵入大腸者。治法。若因風熱。柴胡清肝散。若因怒火者。小柴胡湯加白芍丹皮。

若清氣不升。脾氣下陷者。補中益氣湯。肝經血熱。妄行者。六味地黃丸。脾土不能培肝木者。六君子加柴胡。鈎藤鈎。

偏風口噤

小兒偏風者。少陽厥陰肝膽二經證也。口噤者。由風木太甚。而乘於脾。則筋燥而急。然燥令主於收斂。勁切。或左或右。其因一也。若足陽明胃經氣虛。風邪所乘。其筋脈偏急者。屬內因。若脾肺虛弱。腠理不密。外邪所乘。或吐瀉後。內亡津液。不能養肝。致口眼喎斜。

皆屬肝血不足。內火生風。宜滋腎水養肝血。壯脾土。治法脾胃虛而動風者。異功散加柴胡。鈎藤。鈎肝。肺虛而外邪所乘者。鈎藤。飲若兼目緊上視。寒熱往來。小便淋瀝。面青。脇脹。皆肝經本病也。或脣口喎斜。腹痛。少食。目胞浮腫。面色青黃。肢體倦怠。皆肝木乘脾證也。當審五藏相勝而主之。設執其見證。繫投風藥。反成壞證矣。

角弓反張

角弓反張。卽是痙病。經脈空疎。虛風襲入。而致筋脈

拘急或因驚駭停食肝脾受困內動虛風皆能致此。若身反張強直發熱不搐者風傷太陽也。人參敗毒散小續命湯因驚駭目直呵欠項強頓悶者爲木風。內病鈎藤散因暴怒擊動肝火者瀉青丸。若服前劑其證益甚者此邪氣已去而脾氣虧也。異功散加芎歸補之。若氣血素弱或服攻伐之劑而手循衣領咬牙呵欠者肺經虛甚也。兼進六君子地黃丸補之。

急驚

錢氏云小兒急驚因聞大聲或驚而發搐搐止如故。

此熱生於心。身熱面赤。引飲。口中氣熱。二便黃赤。甚則發搐。蓋熱盛生風。陽盛而陰虛也。經曰。熱則生風。風則痰動。痰熱客於心膈間。風火相搏。故抽搐發動。當用抱龍丸。瀉青丸。除其痰熱。不可用巴豆之藥。婁全善云。急驚屬木。火土實。木實則搐有力。及目上視。火實則動。劓頻。臍上實則身熱而赤。而不吐瀉。偃睡。合睛。治法宜涼。宜瀉。用利驚丸等。亦有因驚而發者。牙關緊急。壯熱。涎潮。竄視。反張。搐搦。顫動。唇口眉毛。眨引。口中熱氣。煩赤。唇紅。二便秘結。脈浮洪數。緊。此

內有實熱外挾風邪當截風足搐若痰熱尚作仍微下之痰熱既泄急宜調養脾氣此肝膽血虛火動生風蓋風生則陰血愈散陰火愈熾若屢服祛風化痰瀉火辛散之劑不愈便宜認作脾虛血損急以六君子湯補其脾胃否則必變慢驚也急驚而見目睛翻轉足攣跳搐忽大叫吐逆藥不得入搐鼻無嚏者不治

慢驚

錢氏云小兒慢驚因病後或吐瀉或藥餌傷損脾胃

肢體逆冷。口鼻氣微。手足癱瘓。昏睡露睛。此脾虛生風。無陽之證也。因吐瀉脾肺俱虛。肝木所乘。或急驚。屢用瀉熱。則脾損陰消。遂變慢驚。而致癱瘓微搐。其全善所謂木虛則搖而無力。火虛則身寒。口中氣冷。土虛則吐瀉。睡而露睛。治宜溫補脾胃。六君子薑桂蠍尾。或兼夾熱夾食夾痰。與外感證相似者。當審其因而治之。大率吐瀉痰鳴氣喘。眼開神緩。昏睡露睛。驚跳搐搦。乍發乍靜。或身熱肢冷。面淡唇青。其脈沉遲微緩者是也。當溫補脾氣為主。佐以安心制肝藥。

若稟賦不足。或久病脾虛。及常服剋伐之藥者。多致此證。若因土虛不能生金。金不能平木。木來侮土。致成慢驚者。五味異功散加當歸。棗仁。鈎藤。以補土平木。若脾土虛寒者。六君子加烏頭。蠍尾。泄瀉加炮薑。木香。不應急加附子。以回陽氣。凡元氣虧損而致昏憤者。急灸百會穴。若待下痰不愈。而後灸之。則元氣脫散而不救矣。此乃藏府傳變已極。總歸虛處。惟脾受之。無風可逐。無驚可療。因脾虛不能攝涎。故津液妄泛。而似痰者。當依前法自効。若不審其因。泛用祛

風化痰之劑。反促其危也。每見小兒脾胃弱者。一病
卽成慢驚。不可泥爲久病。誤藥而後始成也。內經謂
之慢脾風。意可見矣。慢驚而見目不轉睛。痰鳴如拽
鋸聲。項軟身冷。粘汗手足一邊牽引者。不治。○喻嘉
言曰。小兒初生。以及童幼。肌肉筋骨。藏府血脈。俱未
充長。陽則有餘。陰則不足。故易於生熱。熱甚則生痰。
生風。生驚。亦所恆有。設當日直以四字立名。曰熱痰
風驚。則後人不眩。因四字不便立名。乃節去二字。後
人不解。遂以爲奇特之病。且謂此病有八候。以其頭

搖手勁也。而立抽掣之名。以其卒口噤脚攣急也。而立目邪心亂搐搦之名。以其脊強背反也。而立角弓反張之名。相傳既久。不知其妄造。遇此等證。無不以爲奇特。而不知小兒之腠理未密。易於感冒風寒。病則筋脈牽強。因筋脈牽強。生出抽掣搐搦角弓反張種種不通名目。而用金石藥鎮墜。外邪深入藏府。千中千死。間有體堅證輕得愈者。又詫爲再造奇功。遂至各守耑門。雖日殺數兒。不自知其罪矣。如方書中有云。小兒八歲以前無傷寒。此等胡言。竟出自高明。

偏足爲驚風之說。樹幟曾不思小兒不耐傷寒。初傳太陽一經。早已身強多汗。筋脈牽動。人事昏沉。勢已極於本經。湯藥亂投。死亡接踵。何由見其傳經解散耶。此所以誤言小兒無傷寒也。不知小兒易於外感。易於發熱。傷寒爲獨多。世所妄稱爲驚風者。卽此也。小兒傷寒。要在三日內卽愈。爲貴。若待經盡方解。必不能耐矣。又剛瘰無汗。柔瘰有汗。小兒肌腠不密。故剛瘰少。柔瘰多。世醫見其汗出不止。神昏不醒。往往以慢驚風證爲名。而用參耆木附等藥。閉其腠理。熱

邪不得外越。亦爲大害。但比金石藥爲差減耳。所以凡治小兒之熱。但撤其出表不當固其入裏也。仲景原有桂枝湯法。若舍而不用。從事東垣內傷爲治。毫釐千里矣。

天釣內釣

天釣者。發時頭目仰視。驚悸壯熱。兩目反張。淚出不流。手足搐掣。不時悲哭。如鬼祟所附。甚者爪甲皆青。蓋由乳母厚味積毒在胃。致兒心肺生熱。熱痰鬱滯。爲患。加以外挾風邪而發。法當解利其邪。釣藤飲面。

色皎白氣虛喘促者四君子湯加蠟尾內釣者腹痛
多喘脣黑囊腫偃僂反張眼尾赤色若內藏抽掣作
痛狂叫或泄瀉縮腳內證一作則外證亦然極難調
理內證烏蠟六君子丸外證釣藤飲進乳食者可治
若因乳母醇酒厚味積毒在胃加味清胃散若因乳
母鬱怒積熱在肝加味逍遙散稍加漏蘆母子俱服

盤腸急痛

小兒盤腸氣者痛則曲腰乾啼額上有汗皆由肝經
風邪所搏也肝腎居下故痛則曲腰乾啼者風燥其

液故無淚也。額上有汗者風木助心火也。口閉足冷者脾氣不榮也。下利清糞者肝水乘脾也。丁香柿實丸。曲腰乾嘔者鹽湯送下。額上有汗者葱豉湯下。口閉足冷者人參湯下。若面赤脣焦小便不通小腹脹痛者小腸熱也。加味通心散。若痛不止煎葱湯淋揉其腹。就以熱葱熨臍。腹間良久尿出痛止。若因乳母飲食停滯者保和丸。怒動肝火者加味逍遙散。子母俱服。

傷風

小兒傷風鼻塞發熱。或痰壅發搐。多因乳母鼻吹額門。但服惺惺散。或用葱頭七莖生薑一片細切搗爛。攤紙上置掌中。合待溫貼於額門。其邪卽解。乃去其葱。却用絹緞寸餘塗以麪糊。仍貼額門。永無傷風之患。其餘用藥發散。與大人不異。但脾胃怯弱。所以多手足寒冷之證。故治法以照顧脾胃爲主。

諸經發熱潮熱

小兒之熱有五藏之不同。虛實之各異。實則面赤氣粗。口燥唇腫。作渴飲冷。大小便難。或掀衣露體煩啼。

暴叫伸體而卧。睡不露睛。手足指熱。宜用汗下。虛則面色青白。恍惚神緩。口中虛冷。噓氣軟弱。喜熱惡寒。泄瀉多尿。或乍涼乍溫。怫鬱驚惕。上熱下泄。夜則虛汗。屈體而卧。睡而露睛。手足指冷。宜用調補。○壯熱者。肢體大熱。熱不已。則發驚癇。若身熱而口中氣熱。乃風寒外感也。輕則惺惺散。重則羌活之類。發熱而搐搦上竄。搦哭昏睡者。驚熱也。實則瀉青丸。抱龍丸。虛則鉤藤散。肝火內熱者。龍膽瀉肝湯。陰盛格陽而熱者。理中湯。發熱而不欲飲水者。胃氣虛熱也。白朮

散發熱而飲水作渴。喜冷飲食者。胃氣實熱也。瀉黃散。小兒諸熱。其因外證而作者。當從外證治之。或乳母七情厚味。飲食停積。遺熱於兒。或兒嗜食甘肥衣裘過煖。或頻浴熱湯。積熱於內。爲患者。當詳其因而治之。○潮熱者。時間發熱。卽退來。日依時而至。有風寒疳積食癖之分。表裏陰陽虛實之異。如汗出身熱。呵欠面赤。風熱也。傷寒時疫。陰陽相勝。外感熱也。肌瘦口乾。骨蒸盜汗。疳熱也。大小便秘。瀉汗下不解。積熱也。腹背先熱。夜發日止。食熱也。涎嗽飲水乳食不

消癖積也。又有煩熱者。氣粗喘促。心煩不安。頰赤口
瘡。兼發癰證。瘡疹熱者。耳鼻尖冷。心熱者。已午間發。
至夜則涼。虛熱者。困倦少力。大凡壯熱飲水。大便秘
結。屬實熱。瀉黃散加黃蓍犀角。熱渴飲湯。大便如常。
屬陰虛。六味丸。若見驚搐等證。肝經血虛生風也。四
物加天麻。鈎藤。鈎。頰赤口乾。小便赤色。大便焦黃。表
裏俱實熱也。清涼飲。如大便已利。或熱未止。表邪未
解也。惺惺散。微汗之。陽氣下溜於陰中而發熱者。補
中益氣。若食乳嬰兒。當兼治其母。○小兒潮熱。或壯

熱不退多是變蒸及五藏相勝不必用藥又多食積鬱熱由中發外見於肌表只理其中清陽明之熱而表熱自除不可認作外感用解表攻裏等藥重傷其內又潮熱不退恐是出痘亦當審察勿使下藥大抵發熱飲水者熱在內不飲水者熱在外宜詳辨之

傷寒夾驚夾食

錢仲陽云小兒正傷寒者謂感冒寒邪壯熱頭痛鼻塞流涕畏寒拘急是也夾驚者因驚而又感寒邪或因傷寒熱極生風是熱乘於心心神易動故發搐也

羌活散解之。不可使用抱龍丸。以有硃砂能鎮固其邪也。夾食者。或先傷風寒。後復停滯飲食。或先停滯飲食。而後傷風寒。以致發熱氣粗。噯氣壯熱。頭疼腹脹。作痛大便酸臭。先用解散。次與消導。不解者。大柴胡湯。周歲已前傷寒。熱輕者。惺惺散。周歲已後。須解表微汗。若五六日不除。邪入經絡。傳變多端。不可枚舉。大畧叅以六經例治之。

欬嗽

兒因腠理不密。外邪內蘊。或因乳母七情厚味鬱熱。

若風邪外傷。鼻流清涕。頭痛身重者。參蘇飲。○小兒傷寒發熱。欬嗽頭面熱。千金用麻黃湯加石膏黃芩芍藥生薑。○小兒發熱喘欬。喉中水雞聲。千金射干湯。若嗽而吐青綠水者。六君子加柴胡。桔梗。若嗽而吐痰乳者。但加桔梗。勿用柴胡。嗽而嘔苦水者。膽汁溢上也。二陳湯加黃芩。嗽而喉中作梗。心火刑金也。桔梗湯加山梔。有痰加半夏。茯苓。風熱加薄荷。薄荷。小兒嗽久不止。服發散之藥不應。至夜微熱。急當改用小劑。六味地黃。以濟其陰。若面目浮腫者。五味異

功以益其氣。其嗽立止。切禁升發及助氣藥。若痰中有血。或嗽則鼻衄。須加紫苑。因風熱痰結。屢嗽痰不得出者。必用萎蕤白蜜以潤之。○百日內嗽者。名乳嗽。甚難調理。桔梗湯。隨證加薄荷紫蘇羌活。前胡。葱白。香豉之類。更須禁其吮乳。但與粥湯乃効。風邪外感者。惺惺散。痰熱既去。而氣粗痰盛。或流涎者。脾肺氣虛也。異功散。加桔梗。口瘡眼熱。五心煩熱。腹滿氣粗。大便堅實者。涼膈散。若因乳母食五辛厚味。致兒爲患者。母服清胃散。仍參所見諸證治之。

喘

喘急之證。有因暴驚觸心者。有因風寒之邪壅盛者。有因膏粱積熱。熏蒸清道者。有因過服消導。脾胃氣虛者。然喘與氣急。有輕重之別。喘則欲言不能。臨於胸臆。氣急則但息短。心神迷悶耳。治法因驚者。抱龍丸。風寒傷肺氣者。小青龍湯。或三拗湯。加減熱傷肺氣者。當涼肺定喘痰聲如鋸者。小劑金匱麥門冬湯。加牙硝。脾肺氣虛者。面色青白。四肢不溫。大便不實。五味異功散。薛云。前證因脾肺氣虛。腠理不密。外邪

所乘真氣虛而邪氣實者爲多。若已發之際散邪爲主。未發之先補脾爲主。設槩攻其邪則損真氣。徑補其肺則壅其邪。惟在臨證之活法耳。凡喘嗽小便不利則必生脹。脹則必生喘。當分先後標本治之。

吐瀉

小兒脾胃俱傷則嘔泄並作。傷辛熱停滯則嘔吐出酸穢或黃色乳。或腹痛下利者瀉黃散保和丸選用。胃虛食不化而發熱者六君子加黃連吳茱萸木香。若停滯已去泄瀉不已理中湯去參加茯苓木香胃

氣不能化食。益黃散。若傷生冷腹痛。瀉利。青白六君子加砂仁。木香。炮薑。若傷魚肉等物。六君子加山查。砂仁。若瀉紅黃赤黑。腸胃俱熱也。養胃湯加木香。黃連。若夏秋傷熱。吐瀉。色黃者。玉露散。若夏秋霍亂吐瀉。手足心熱。口乾。脣燥。喜飲冷水者。五苓散。凡霍亂吐瀉。手足逆冷。喜飲熱湯者。理中湯。若瀉利青白乳食不化。額上微汗。脈沉遲。而或噦逆者。由胃氣虛甚。過服尅伐。使清氣不升。濁氣不降。以致氣不宣通而作也。若瀉而噤。臭吞酸。胸腹滿痛。按之益甚者。雖作

瀉而所傷之物未消也。保和丸消導之。腹痛按之不
哭者。乳食已消也。異功散加木香。驚瀉者。肝主驚。木
盛必傳克於脾。脾土既衰。則乳食不化。水道不調。故
泄瀉色青。或兼發搐也。亦有因乳母脾虛受驚。及怒
動肝火。致兒吐瀉色青。異功六君加柴胡。鉤藤。鉤蟻
梢之屬。實脾以寧肝。膽之氣。慎勿用峻攻之藥。脾氣
益虛。肝邪彌甚。甚至抽搐反張也。若母食厚味而乳
熱者。清胃散。若母飲燒酒而乳熱。或子母身赤。或昏
憤吐瀉。丹方用錫掇盛滾水。蓋良久。取蓋上蒸氣水。

服之卽解。同氣相求之義也。吐痰涎及綠水者。胃虛受冷也。吳茱萸湯。○小兒衣甚薄。則腹中乳食不消。不消則大便酸臭。此欲爲癖之漸也。便將紫丸微消之。乳哺自當如常。若兒不受食哺。而但欲乳者。此是有癖。當下之。不下必致寒熱吐利。失下之故也。凡小兒屎黃而臭甚。此腹中有伏熱。龍膽湯微下之。若白而酸臭者。此宿食不消也。當與紫丸。微者少與。藥令內消。甚者稍增。藥令小下。節乳哺數日。令胃氣平和。若不節乳哺。則病易復。復下之。則令腹脹滿。必發痼。

此爲食癘。輕則下之。重則難療。○大凡吐乳瀉青色。手足乍冷乍熱者。屬驚。法當平肝補脾。若吐瀉青白色。而不甚臭。手足指冷。或昏睡露睛者。屬虛。法當溫補脾土。若吐瀉黃赤色。而臭穢異常。或喜冷飲而睡不露睛。手足指熱者。屬實。法當消導。清理脾胃。此驗虛實補瀉法也。

魛病

海藏云。魛病者。因母有妊兒。飲其乳所致。他孕相迫。亦能致此。其狀微利。寒熱往來。或發熱形瘦。腹大毛

髮華髮情思不悅令兒斷乳先與龍膽瀉肝湯加扁
蓄及白餅子下之後與異功散益黃散補之稟氣素
虛不勝攻擊者理中加黃連茯苓蓄或一味扁蓄
濃煎日服以其能利小便也

瘥

小兒瘥疾不越風食乳癖食積痰積挾驚挾暑與脾
虛胃弱之不同蓋風則多寒食則多熱乳癖則泄瀉
多哭痰積則嘔吐喘鳴食積則腹脹下血挾驚則發
搐指冷挾暑則昏睡壯熱脾虛則倦怠肢令胃虛則

多渴少食治法不離疎風消導豁痰如小柴胡隨證
加減多寒則加羌活桂枝多熱則加橘皮枳實泄瀉
則加厚朴神麴嘔吐則加橘皮枳實下血則加枳實
黃連發搐則加鈎藤羌活昏睡則加茯苓澤瀉脾虛
則補中益氣加桂枝胃虛則六君子加草菓夜發則
加當歸日晏則加升麻若痢後瘧瘧後痢與夫三日
瘧及久瘧不止俱補中益氣爲主瘧母以小柴胡加
鼈甲桃仁丸服大抵小兒肌腠疎薄無汗者絕少卽
使無汗稍加桂枝有汗并加芍藥不必用知母石膏

紫蘇羌活輩也。至於勞瘵瘴瘧之類。小兒本無不復
贅及其有因乳母七情六淫所致者。又當以小柴胡
逍遙散之類兼治乳母爲當。

痢

錢仲陽云。瀉利黃赤黑皆熱也。瀉利清白米穀不化
皆冷也。東垣云。白者溼熱傷於氣分。赤者溼熱傷於
血分。赤白相雜氣血相亂也。羅謙甫云。小兒下利色
白大都受寒。下利膿血大都受熱。與食積。薛云。手足
指熱飲冷者爲實熱。香連丸。手足指冷飲熱者爲虛。

寒理苓湯若兼體重。或病溼熱傷脾也。升陽益胃湯。小便不利。陰陽不分也。五苓散。若溼熱退而久痢不愈者。脾氣下陷也。補中益氣湯。倍升柴。瀉利兼嘔。或腹中作痛者。脾胃虛寒也。異功散。加炮薑木香。或變而爲疝者。六君子加升柴。若積滯已去。利仍不止者。脾氣虛也。四君子加肉果。有寒加吳茱萸。炮薑。有熱加炒黑宣連。丸服尤妙。

脫肛

實熱則大便秘結。虛寒則肛門脫出。因吐瀉脾虛。肺

無所養故大腸氣虛下脫也補中益氣爲主若脫出
緋赤或作痛者血虛有熱也本方加丹皮芍藥甚則
加川連外用槐角煎湯熏洗若色淡不腫不痛無血
此屬氣虛只用補中益氣以升舉之或加烏梅以收
斂之大凡手足指熱屬胃熱手足指寒屬胃寒若小
兒肛癢或嗜甘肥大腸溼熱壅滯或受毒生蟲而齧
蝕肛門者內服肥兒丸外以雄黃銅條爲散納肛門
若因病不食蟲無養而蝕肛者爲狐惑黃連犀角散
若蝕肛透內者不治

便血

熱入大腸則便血。補中益氣加黃連、柴胡。熱入小腸則尿血。六味丸。小兒多因胎中受熱。或乳母六淫、七情、厚味積熱。或兒自食甘肥積熱。或六淫外侵而成。糞前見血者。清胃散加槐米。糞後見血者。清胃散加犀角、連翹。若嬰兒則以治母爲主。餘當臨證制宜。

大便不利

小兒大便不通。肺與大腸有熱也。清涼飲。若飲食夾驚及積滯不通者。瀉青丸。此皆治實熱例也。若因乳

母膏梁積熱。及六瀉七情鬱火。傳兒爲患者。清胃散加蜂蜜。清邪解鬱。若兒稟賦怯弱。五心煩熱。作渴引飲。而大便難者。六味丸加三冬。滋補肺腎。若用大黃麻仁輩。是速其咎也。

小便不通

小便不利。有在氣在血之分。上焦氣分有火。則必渴。下焦血分有壅。則不渴。若津液偏滲於腸胃。大便瀉利。而小便清少者。五苓散加半夢人參。若脾胃氣滯。不能通調水道者。補中益氣加木通。澤瀉。心神煩熱。

臍腹脹悶而小便不通者。梔子仁散。脾肺燥熱陰無以化而赤滿者。黃芩清肺飲。膀胱陰虛陽無以生而淋瀝者。滋腎丸。若膀胱陰虛陽無以化而淋瀝者。六味丸。若因乳母厚味酒麪積熱者。清胃散。

遺尿

膀胱者州都之官。津液藏焉。卧則陽氣內收。腎與膀胱之氣虛寒不能約制。故睡中遺尿。一味補骨脂酒炒爲散。醇酒或益智仁煎湯送下。脾肺氣虛者。補中益氣加補骨脂山茱萸。

疳

楊氏云。疳者。府藏蟲疳也。其名甚多。姑舉其要。蟲疳者。其蟲如絲。出於頭頂胸背之間。黃白赤者可治。青黑者難療。虻疳者。皺眉多啼。嘔吐清沫。中脘作痛。腹脹青筋。唇口紫黑。頭搖齒癢。脊疳者。身熱羸瘦。煩渴下利。拍背有聲。脊骨如鋸。齒十指皆瘡。頸嚙爪甲。腦疳者。頭皮光急。滿頭俱瘡。腦熱如火。髮結如穗。遍身多汗。腮腫。顙高。疳渴者。日則煩渴。飲水不食。夜則渴止。疳瀉者。毛焦唇白。額上青紋。肚脹腸鳴。瀉下糟粕。

疳痢者停積宿滯水穀不聚瀉下惡物疳腫者胃中
有積肚腹紫脹脾復受滯則頭面手足虛浮疳勞者
潮熱往來五心煩熱盜汗骨蒸嗽喘枯悴渴瀉飲水
肚硬如石面色如銀無辜疳者腦後項邊有核如彈
丸按之轉動軟而不疼壯熱羸瘦頭露骨高乃乏乳
所致丁奚疳者手足極細項小骨高尻削體痿腹大
臍突號哭胸陷哺露疳者虛熱往來頭骨分開翻食
吐蟲煩渴嘔噦走馬疳者疳熱上攻速如走馬或痘
毒上攻則牙齒蝕爛蓋齒屬腎腎虛受熱疳火上炎

致口臭齒黑。輕則牙齦腐爛。唇吻腫痛。可治。重則牙齦蝕落。腮頰透爛。不治。其證雖多。要不出於五藏。治法。肝疳。則頰左生瘡。眼目赤爛。肢體似癰。兩耳前後項側。缺盆兩股結核。或小腹內股。莖囊。翠丸腫潰。便溺澀閉。或出白津。或咬指甲。搖頭側目。白膜遮睛。羞明畏日。吐大青筋。口乾下血。用蘆薈丸以殺蟲。地黃丸以滋腎。心疳。則口舌蝕爛。身體壯熱。面黃頰赤。或作腫痛。腹滿。臍悶。或掌熱咽乾。飲水便出。盜汗。齟齬。虛驚。用胡黃連丸以治心。異功散以補脾。脾疳。則體

黃而瘦皮膚乾濇頭不生髮或生瘡痂或人中口吻
赤爛吐逆乳食嗜土腹大臍突瀉下酸臭小便濁白
或合目昏睡惡聞木音用肥兒丸以治疳五味異功
散或益黃散以生土肺疳則鼻外生瘡咽喉不利頸
腫齒痛喘嗽氣促寒熱少氣皮膚皺揭鼻癢出涕
血目黃小便混濁而頻數用加味陷胃丸以治肺補
中益氣湯以生金腎疳則腦熱吐痰手足逆冷肢體
瘦削夜則微寒發熱泄瀉腹痛口臭作渴齒齲潰爛
爪黑面鰲尻耳生瘡或耳出水用蟾蜍丸以去疳地

黃丸以補腎其無毒疳用保元湯蟾蜍丸丁奚疳露
用六味丸蟾蜍丸走馬疳蚊馬鳴散服蟾蜍丸若作
渴瀉利腫脹勞瘵等類詳參方論而治之蓋疳者乾
也因脾胃津液乾涸而患在小兒爲五疳在大人爲
五勞總以調補脾胃爲主○凡小兒疳在內目腫腹
脹臍突溺稠瀉利青白體漸瘦弱疳在外鼻下赤爛
頻揉鼻耳或肢體生瘡鼻瘡蘭香散諸瘡白粉散
熱疳如聖丸冷疳木香丸冷熱交錯元氣久虧溫脾
丸最宜○疳病害服者用蕪荑仁青葙子細末各一

錢不經水。騙雞肝一具。研爛入白酒釀飯上蒸熟。食之。不過五七服。必愈。

二便色白

秘旨云。小兒便如米泔。或溺停少頃。變作汁濁者。此脾胃溼熱也。若大便泔白色。或如魚凍。或帶紅黃黑者。此溼熱積滯也。宜理脾胃。消滯去溼。熱節飲食。若忽然變青。卽變蒸也。不必用藥。若久不愈。用補脾制肝藥。若母因七情致兒小便如泔。肥兒丸大便色青。日久不復。或兼泄瀉。色白。或腹痛者。六君子加木香。仍

審乳母飲食七情主之

食積

小兒食積者因脾胃虛寒乳食不化久而成積其證
至夜發熱天明後涼腹痛膨脹嘔吐吞酸足冷壯熱
喜睡神昏大便酸臭甚則下血是也若兼寒熱者爲
食積發熱若食在胃者消之腹痛痞脹按之益痛者
下之下後仍痛按之則止者導之夾食傷寒者先散
之參蘇飲熱甚便秘者先利之大柴胡湯如無外感
但只傷食不至於甚保和丸調之蓋脾爲至陰之藏

故凡脾病者至夜必熱。熱而兼寒則又見所勝者侮所不勝矣。食未消者消之則寒熱止。食既消者補之則寒熱痊。若手足並冷喜熱飲食此中州虛寒也宜溫之。大便欲去不去脾氣下陷也宜升之。若夜間或侵晨泄瀉者脾腎俱虛也。四神丸手足並熱作渴飲水者脾胃實熱也。瀉黃散大便秘結大柴胡湯手足雖熱口不作渴大便不實者白朮散大便下血者理中湯去參加枳實黃連紅麴。

腹痛腹脹

小兒腹痛體瘦而色饒白目無精光手足指寒口中
氣冷不思飲食或嘔利撮口此脾土虛而寒水所侮
也益黃散或理中丸去參加茯苓若口中氣溫手足
心熱面色黃白日無精光或多睡惡食或大便酸臭
此積痛也消積丸甚者白餅子下之後以白朮散調
補脾胃若腹脹而悶亂喘滿者白餅子若不悶亂喘
滿者脾虛也白朮散調補之慢下而致目胞腮面四
肢浮腫肚腹愈脹脾虛欲發驚癇者塌氣丸溫理之
若腹中有癖不食飲乳則吐按之則啼當暫用白餅

子下之蓋小兒病此良由乳食不消伏於腹中乍冷乍熱飲水過多脾胃虛弱不能傳化水穀以致四肢羸瘦肚腹漸大而成疳矣六君子加乾蟾若痛連兩脇肝木乘脾也四君子加柴胡芍藥若腹痛重墜脾氣下陷也補中益氣湯加枳實若手足指冷或呃逆泄瀉寒水侮土也六君子加炮薑肉桂不應急加附子若服剋削之藥致腹作痛按之痛止者脾氣復傷也五味異功散至於腹脹喘滿亦皆脾虛邪乘所致東垣所謂寒脹多而熱脹少熱者六君子加苓連枳

朴寒者六君子加薑桂吳茱萸亦有寒熱錯雜者瀉
心湯芩連炮薑並用若治實服用二陳加枳朴木香
有熱加芩連可也

煩渴

小兒唇紅如丹卽發渴。紅甚焦黑則危篤。若三焦煩
熱作渴導赤散。風熱瀉青丸。虛煩懊憹梔子豉湯。虛
煩不得眠酸棗湯。夜甚者當歸補血湯。傷寒後唇日
焦者竹葉石膏湯。瀉利作渴五苓散。暑傷心脾煩渴
引飲者人參白虎湯。下利脾虛作渴七味白朮散。熱

結膀胱。小便秘澇。五苓散。上焦虛熱。四君子湯。膏粱積熱。清胃散。脾虛積熱。瀉黃散。中氣虛熱。異功散。腎水虛熱。六味丸。慎勿誤用寒涼降火。脾胃復傷。則腹脹而爲敗證矣。

汗

小兒腠理疎薄。常時微汗。但不宜過多。亦不可衣被過厚。使汗大出。若睡中出汗。名盜汗。止汗散。遍身多汗。煩熱爲胃熱。三補丸。胃虛汗者。上至項。下至臍也。益黃散。六陽虛汗者。上至頭。下至項。乃稟賦不足。保

元湯加防風白朮小兒元氣未充腠理不密或飲食
停滯或厚衣溫煖熱鬱心包而津液妄泄也導赤散
血虛用人參當歸等分煎服名團參湯其盜汗屬胃
經虛熱者五味異功腎經虛熱者六味丸若寒水侮
土益黃散設泛行施治誤損脾胃多成疳瘵大凡汗
多亡陽必至角弓反張顙項強用十全大補多有
生者

黃蘗

夫人身之神貴於藏而默用見於外則內虛也其證

皆由脾氣有虧運化失職。溼熱留於肌膚。發而爲瘡。
錢仲陽所謂身痛背強。二便瀯滯。遍身面目爪甲皆
黃。小便褐色是也。治法宜固脾爲先。如專用剋伐。寬
中。淡泄。利水之藥。則鮮有不致危者。若初生及百日
之中。半旬之內。不因病而身黃者。胃熱胎黃也。腹大
食土爲脾疳。兼作渴冷飲。瀉黃散。小便不利。五苓散
加茵陳。大便秘。茵陳蒿湯。病後發黃。肢體浮腫。白朮
散。清便自調。肢冷嗜卧。益黃散。身淡黃白。理中丸。加
茵陳。身熱膈滿。肌膚面目皆黃。瀉黃散加枳殼。生薑。

若閉目壯熱多哭不已。大小便赤。口。中熱氣。乃妊
母厚味遺毒也。母子並服清胃散。生料地黃丸。忌酒
麪。五辛熱物。倘誤傷脾土。急則驚風吐瀉。緩則肢體
浮腫。小便不利。眼目障閉。多成疳疾矣。又有脾虛發
黃者。當於脾胃中求之。

蚘

曹氏云。蚘者。九蟲之一。因藏府虛弱。及傷甘肥生冷。
致蚘不安。動則腹中攻痛。或作或止。日吐涎水。貫心
則死。錢仲陽云。吐水不心痛者。胃冷也。吐沫心痛者。

蟲痛也。與癰相似。但目不斜。手不搐耳。化蟲丸。田氏云。蟲痛啼哭。俛仰坐卧不安。自按心痛。時時大叫。面色青黃。唇色兼白。目無精光。口吐涎沫也。若因胃冷。卽吐。理中湯加炒川椒烏梅。或送烏梅丸尤妙。若中氣虛而蟲不安者。但補脾胃自安。冬月吐蟲多是胃氣虛寒。白朮散加丁香烏梅。

疝

小兒陰腫疝氣多屬肝腎氣虛爲風邪所傷。血氣相搏而成。六味丸加茴香川棟子。若坐卧溼地所致者。

五苓散換蒼朮加蠟尾柴胡山梔車前不時寒熱者
小柴胡去參加桂苓川棟蠟尾若因啼哭不止動於
陰器結聚不散而舉丸腫大者桂枝湯加細辛當歸
木香蠟尾啼叫氣逆水道不行而致者沉香降氣散
加青皮蠟梢柴胡小腹作痛小便瀉滯者龍膽瀉肝
湯加延胡索肉桂

目

五藏六府之精氣皆上注於目而黑睛爲肝之竅瞳
神又爲腎之精華小兒目無精光及白睛多黑精少

者肝腎俱不足也。地黃丸加鹿茸。晝視通明。夜視罔見者。所稟陽氣衰弱。遇夜陰盛。則陽愈衰。故不能視也。中和養胃湯。煮肝散。疳眼者。因肝火溼熱。上衝脾氣。有虧。不能上升清氣。故生白翳。瞳閉不開。眵淚如糊。久而膿流。遂至損目。益氣聰明湯。決明。雞肝散。目閉不開者。因乳食失節。或過服寒涼之藥。使陽氣下陷。不能升舉。補中益氣湯。眼連翳者。肝經風熱也。柴胡清肝散。若目劓面青。食少體倦。肝木尅脾土也。五味異功散。加白芍。柴胡。生薑。實者去。參。換赤芍。加羌

活蠟梢若生下目黃壯熱大小便秘結乳食不思面赤眼閉者皆由在胎時感母熱毒所致兒服瀉黃散母服地黃丸若乳母膏梁積熱致兒目黃者母服清胃散若肢體面目爪甲皆黃小便如屋塵色者難治餘察眼目本門治之○小兒誤跌或打著頭腦受驚肝系受風致瞳神不正名曰通睛宜石南散吹鼻內服牛黃平肝鎮驚藥

耳

耳者心腎之竅肝腎之經也心腎主內證精血不足

肝膽主外證風熱有餘或聾聵或虛鳴者稟賦虛也。或脹痛或膿癰者邪氣客也。稟賦不足地黃丸肝經風熱柴胡清肝散。若因血燥梔子清肝散不應佐以六味丸。若因腎肝疳熱朝用六味丸夕用蘆薈丸。若因乳母膏粱積熱而致者子母並服加味清胃散。

鼻塞鼻衄

曹氏云鼻乃肺之竅皮毛腠理乃肺所主。因風邪客於肺而鼻塞不利者內服消風散外用葱白七莖入臘粉少許搗攤帛上掌中護溫貼顙門小兒鼻衄多。

因驚仆氣散血無所羈而隨氣上脫先用小烏沉湯
次用止衄散或異功散加柴胡山梔久不愈用麥冬
黃耆當歸生地人參五味煎服若衄久血脫但出淡
紅水或帶黃黑色者難已

解顱

解顱者生下顱門不合也長必多愁少笑目白睛多
而色眊白肢體消瘦皆屬腎虛按腎主髓腦爲髓海
因父母精血不足不能斂固也地黃丸加五味鹿茸
更用大南星微炮爲末醋調攤緋帛烘熱貼顱門○

虛寒用細辛桂心乾薑爲末乳汁和傅上乾復傅之
兒面赤卽愈○又方半夏生薑芎藭細辛桂心烏頭
苦酒煮去滓以帛浸藥汁中適寒溫以敷額上冷更
溫之復敷如前朝暮各三四敷乃止二十日可愈存
至七八歲或十四五歲氣血旣盛而自合若縱恣色
慾戕賊真陰終焉不壽此證若在乳下當兼補其母
更以輭帛束繫兒首使其易合亦有顙陷顙填俱屬
賦稟不足或五疳久病元氣虧損瀉利氣虛脾氣不
能上充所致者補中益氣及十補丸若手足並冷前

湯加薑桂不應。虛寒之甚也。急加附子。緩則不救。

龜胸背

龜背者。由兒生下。風客於脊。入於骨髓。小續命去附。加防風。龜胸者。因肺受溼熱。攻於胸膈。龜胸丸並用。龜尿點其骨節。多有得愈者。蓋小兒腠理不密。風邪乘之。或痰飲蘊熱於肺。風熱交攻。而致。或坐蚤風入骨髓。治用上法。若稟受肝腎虛熱。六味丸腎氣不足。八味丸背加鹿茸。胸加龜甲。治之貴早。遲則不驗。

虛羸

小兒虛羸因脾胃不和不能乳食使肌膚瘦弱或大病後脾氣尚弱不能傳化穀氣所致若冷者時時下利脣口濇白熱者身溫壯熱肌體微黃更當審形色察見證如面赤多啼心之虛羸也面青目劓肝之虛羸也耳前後或耳下結核肝經虛火也頸間肉裏結核食積虛熱也面黃痞滿脾之虛羸也面白氣喘肺之虛羸也目睛多白腎之虛羸也仍參相勝治之

五遲五軟五癭

五遲者立遲行遲齒遲髮遲語遲是也蓋腎主骨齒

者骨之餘髮者腎之榮若齒久不生生而不固髮久不生生則不黑皆胎弱也良由父母精血不足腎氣虛弱不能榮養而然若長下可立立而骨軟大不能行行則筋軟皆肝腎氣血不充筋骨痿弱之故有肝血虛而筋不榮膝膝蓋不成手足拳孺者有胃氣虛而髓不溫骨骨不能用而足脛無力者並用地黃丸爲主齒遲加骨碎補補骨脂髮遲加龜版鹿茸何首烏立遲加鹿茸桂附行遲加牛膝鹿茸五加皮語遲之因不一有因妊母卒然驚動邪乘兒心不能言者

有稟父腎氣不足而言遲者有乳母五火遺熱閉塞
氣道者有病後津液內亡會厭乾涸者亦有脾胃虛
弱清氣不升而言遲者邪乘兒心葛蒲丸腎氣不足
地黃丸加遠志閉塞氣道加味逍遙散津液內亡七
味白朮散脾胃虛弱補中益氣湯若病久或五疳所
致者但調補脾胃爲主○五鞭者仰頭攣氣手脚心
堅口瘰肉硬此陽氣不榮於四末獨陽無陰之候若
腹筋青急者木乘土位也六味丸加麥冬五味若係
風邪小續命去附子○五鞭者頭頂手足口肉皆鞭

胎稟脾腎氣弱也。若口軟不能嚙物，肉軟不能補骨，必先用補中益氣以補中州。若項軟天柱不正，手軟持物無力，足軟不能立地，皆當六味丸加鹿茸五味兼補中益氣二藥。久服仍令壯年乳母哺乳爲第一義。

失音

舌者音聲之機也。喉者音聲之關也。小兒卒然無音者，乃寒氣客於會厭，則厭不能發，發不能下，開闔不致，故無音也。若咽喉聲音如故，而舌不能轉運言語。

則爲舌瘡。此乃風冷之邪客於脾絡。或中舌下廉泉穴所致。若舌本不能轉運言語。而喉中聲動者。則爲喉痛。此亦風痰阻塞。使氣道不通。故聲不得發。而喉無音也。大抵此證多有稟賦不足。不能言者。有乳母五志之火遺兒。熏閉清道。不能言者。有驚風中風。不能言者。若遺熱與津液耗者。七味白朮散清氣不升者。補中益氣湯。稟賦不足。與虛火傷肺者。地黃丸。若仰首欬嗽。肢體羸瘦。目白睛多。或兼解顙。呵欠咬牙等證。悉屬腎虛。非地黃丸加鹿茸遠志不能治也。若

吐瀉後或大病後雖有聲而不能言又能嚙物者非失音乃胃氣不能上升地黃丸與補中益氣湯兼服

咬牙

小兒寤寐不時咬牙及嚙乳者雖多屬驚然所致各有不同惟嚙乳驚搐者抱龍丸若發熱飲水叫哭而搐者心經實熱也瀉心湯睡困驚悸合目而卧者心經虛熱也導赤散面青目斜呵欠項強煩悶者肝經實熱也柴胡清肝散手循衣領及亂捻物者肝經虛熱也發搐日青面赤肝經風熱也並宜六味丸

夜啼驚啼

夜啼有二。曰脾寒。曰心熱。夜屬陰。陰勝則脾藏之寒愈盛。脾爲至陰。喜溫而惡寒。寒則腹中作痛。故曲腰而啼。得燈火其啼便止。其候面青白。手腹俱冷。不思乳食。亦曰胎寒。益黃散加鈎藤。若見燈愈啼者。心熱也。心屬火。見燈則煩熱。內生兩陽相搏。故仰身而啼。其候面赤。手腹俱暖。口中氣熱。導赤散加黃連。麥冬。若面色白而黑睛少。屬腎氣不足。至夜陰虛而啼也。宜用六味丸。因驚者。小兒客忤驚啼治之。○驚啼者邪

氣乘心也。哭而多淚是驚也。啼而無淚是痛也。若因心火不足而驚啼者。秘旨安神丸。心火熾盛導赤散。木火相搏加柴胡梔子肝血不足六味丸。

喜笑不休

經曰。神有餘則笑不休。又曰。在藏爲心。在聲爲笑。在志爲喜。又火太過爲赫義。赫義之紀其病笑謔狂妄。又云。少陰所主爲喜笑。又云。精氣并於心則喜。此數者皆言屬心火也。先用瀉心湯治其心火。次與六味丸滋其腎水。太僕所謂壯水之主以制陽光也。扁鵲

云其人唇口赤色者可治青黑者死若腎水虧涸不勝心火而喜笑不休尋作不安之態者六味地黃丸肝不過盛上挾心火而喜笑不休者柴胡清肝散餘兼別證各從其類而參治之

循衣撮空

循衣撮空皆由肝熱筋脈血枯而風引之故手指爲之撮歛也宜確服六味丸間有回生之功亦有脾虛肝乘者六君子加鈎藤蠅梢若肝經實熱瀉青丸蓋循衣撮空皆病之敗證求其實熱十無一二許叔微

云循衣撮空皆神虛無主非大劑獨參保元不能挽回虛寒則十全大補人參養營大建中溫補之然亦有心包熱極所致者王海藏治血脫循衣撮空摸牀揚手撻頭錯語失神脈弦浮而虛血脫內燥熱之極也氣粗鼻乾此爲難治生地黃黃連湯

壽夭

孫眞人曰兒初生叫聲連延相屬者壽聲絕而復揚急者不壽啼聲散不成人啼聲深不成人臍中無血者好臍小者不成人通身軟弱如無骨者不壽鮮白

長大者壽。生下目自開者。不成人。目視不正。數動者。大非佳。汗血者。多危。不壽。汗不流。不成人。小便凝如脂膏。不成人。頭四破。不成人。常搖手足者。不成人。額上有旋毛者。早貴。妨父母。兒生枕骨不成者。能言而死。尻骨不成者。能踞而死。掌骨不成者。能匍匐而死。踵骨不成者。能行而死。臍骨不成者。能立而死。身不收者死。魚目者死。股間無生肉者死。頤下破者死。陰不起者死。陰囊下白者死。赤者死。卵縫通達黑者壽。兒小時識悟通敏過人者多夭。大則項橐顏回之流。

也。小兒骨法成就。威儀迴轉遲舒。稍費人精神雕琢者。壽。其預知人意。迴旋敏速者。夭。大則楊修。孔融之徒也。

張介賓曰。小兒之壽夭。其因有二。一則由於稟賦。一則由於撫養。夫稟賦爲胎元之本。精氣之受於父母者也。撫養爲居處寒溫。飲食饑飽之得失者也。凡少年之子。多有羸弱。慾勤精薄也。老年之子。多強壯者。慾少精全也。多飲者。子多不育。蓋以酒溼亂精。則精半非真。而溼熱勝也。多慾者。子多不育。以孕後不節。

則泄母陰奪養胎之氣也此外如饑飽勞逸五情六氣無不各有所關是皆所謂稟賦也至於撫養之法則俗傳有云若嬰兒安須帶饑寒此言殊爲未審夫欲其帶饑者恐飲食之過耳過則傷脾而病生寧使畧饑其猶庶幾至若寒之一字則大有關係小兒以未成之血氣嫩薄之肌膚較之大人相去百倍顧可令其帶寒耶嘗見新產之兒多生驚搐此爲穩婆不慎則風寒襲之多致不救者此也及其稍長每多發熱輕則爲鼻塞欬嗽重則爲小兒傷寒勿科不識一

紫呼爲變蒸投藥致斃者此也或寒氣傷藏則爲吐瀉或因寒生熱則爲驚爲疳種種變生多出外感雖稟體強盛不畏風寒者亦所常有但強者三之一弱者三之二傷熱者十之三傷寒者十之七况膏粱貧賤氣質本是不同醫家不能察但知見熱攻熱嬰兒不能言病家不能辨徒付之命誠可歎也又有謂小兒純陽之體故多宜清涼治之此說尤爲誤人而王節齋又曰小兒無補腎謂男至十六而腎始充滿既滿之後妄用虧損則可用藥補之若受胎之時稟之

不足則無可補稟之原足又何待補嗚呼此何說耶
夫小兒謂純陽者以其陰氣未成卽腎虛也或父母
多慾而所稟水虧亦腎虛也陰既不足而不知補之
陰絕則孤陽亦絕矣何謂無可補耶殊不知錢氏六
味地黃丸專治小兒腎虛解頤以其純陽無陰故取
崔氏八味丸裁去桂附以獨補腎水也此義惟薛立
齋得之惜乎世醫多所未悟也

張氏醫通卷十一